

Ebedeoidi

inänite cadota ante näni yewämongainta

Wængongui beyä tömengä Wengä pönö apänegacäimpa

1 ¹Wængongui wëñëñedë wantä wantä iñö apänedinque wantä iñö wadö bai cædinque wantä iñö wadö bai cædinque tömengä beyä në apänedäni inänite tæmpo pönö apänecä ëñengadänimpa. Ëñëninque tömëñäni wæätë adodö ante mönö mæmæidi inänite tæmpo apänegadänimpa.

²Nöwo guiquënë mäninö ante Wængongui dodäni inänite nänö apänegaiönæ idæwaa bayonte tömengä apänecä ëñëninque tömengä Wengä wæätë mönö imonte pönö apänegacäimpa. Wëñë pöni inguipoga dæ ii ëmönæ dæ añonte Wæmpocä tömengä Wengä ingante, Badöe, angä ëñente cæyongä tömengä nänö cædö beyä Wæmpocä tömancoo badongacäimpa. Mänömai beyä në badongä iñongante Mæmpo Wængongui wæätë, Tömancoo në ænguingä iñömö botö Wengä adocanque në ænguingä ingampa ämopa, angacäimpa.

³Mæmpocä në tæi ëmönongä inte ñäö ëmongä iñongä tömengä Wengä iñömö adobai në tæi ëmönongä inte ñäö ëmongä ingampa. Ìninque, Wængongui Wengä nö pöni entawëninque nänö quëwengainö bai Mæmpocä iñömö edæ adobai pöni entawënongå inte edæ nöingä cæte quëwengä ingampa, ante mönö edonque ëñengäimpa. Ìnguipo incæ ii ëmönæ incæ a ongoncoo incæ awëmö iñömö ongoncoo incæ tömengä Wengä adocä tæi piñænte nänö angäinö beyænque tömancoo edæ ñöwo ganca

cöwë ongoncoo incoopa. Ayä nämä wepä godonte wëñinque adocä iñömö wënæ wënæ mönö cæpämö ante ñä mënongagacäimpa. Mänömai në ñä mënongaingä inongä inte tömengä do æidinque Wængongui në tæi ëmongä tömëmængä inö tæ contadinque ongongampa.

Tömengä ñænængä iñongä anquedoidi pönömenque inäni

⁴Mänömai æi contadinque tömengä në ñænængä iñongante Wængongui iñömö, Bitö ëmöwo bitö cöwë ænguëngaïwo, ante pemongacäimpa. Wængongui anquedoidi guiquënë wiï adobai ñænænäni iñönänite Wængongui tömëñäni inänite adobai ante pemönämai ingacäimpa. ⁵Edæ anquedoidi iñönänite æcämenque ingante Wængongui dicæ,

“Botö Wëmi inömi imipa.

Ñöwoönæ bitö Mæmpobo babopa,”

Ante angantawogaa. Ayä adobai,

“Botö tömengä Mæmpobo incæboimpa.

Ìninque tömengä botö Wengä incæcäimpa,” ante anquedo ingante änämai ingacäimpa.

⁶Wæätë tömengä Wengä Tänocä iñongante inguipoga da pönöninque Wængongui,

“Botö anquedoidi tömänäni iingä önöwa inö ædæ wæëninque, Bitö Wængongui Wëmi imidö ænguënë, ante watapæ apänecädänimpa,” ante apänegacäimpa.

⁷Ayä wæätë anquedoidi inänitedö ante apänedinque,

“Tömengä godö cæcä ate tömengä anquedoidi inömö woboyä nangui pämə baï quingä pöni cæcädänimpa.

Ayä tömengä godö cæcä ate tömengä beyä nē waa cädäni inömö gonga bæcoguñewate baï nangui cæcädänimpa.”

⁸Ante apänedinque tömengä Wengä ingante guiquënë Wængongui incä iïmai angacäimpa.

“Bitö nē Wængongui inömi inte eñēmi. Awënë Odeye badinque Awënë containpaa tæ contagaïmi inte bitö ñimpo cädämaï inte cöwē Awënë Odeyebi inömi inte ongoncæbiimpa.

Ïninque Awënë Odeyebi inömi inte bitö nempo quëwēnāni inānite nō pōni cæte aadinque yaēmē töēmē pōni næænte bai nē ämi incæbiimpa.

⁹Nē Wængonguïmo inömo inte botö inömö bitö Awënë Wængonguïmo imopa. Ïninque botö, Nō cæte mönō quëwenguïno ante nē waadebi inömi inte bitö eñēnāmaï nāni cæinō ante edæ wii ainēmi imipa.

Mänömaï imi ante adinque botö iïmaï pönö cæbopa. Bitö tönö godongämä ongönāni Awënë badinque bitö watapæ tocæbiimpa, ante cædinque botö, oginguipæ pönö gao caate bai nangui cægaboimpa.”

¹⁰Ante Mæmpo Wængongui angacäimpa. Ayä adobaï tömengä Wengä ingante apänedinque,

“Bitö Tæiyä Awënë inömi inte wëenēñedē pōni inguipo mä cō cæte bai cædinque tömēmi badongabiimpa, angacäimpa. Ayä öönädē ongoncoo adobaï tömēmi bitö öonpoca badongaincoo inte ongoncoopa.

¹¹Mänincoo guiquënë iïncayä ate wido cæte bai bayonte Bitö guiquënë cöwē ongonguïmi imipa.

Mänincoo guiquënë mönō weocoo pedæncoo woincoo bai bayonte,
¹²waocä yacooque æninque topo cæcä bai cædinque bitö wæætē bitö badongaincoo ænte topo cæte bai cæcæbiimpa.

Wæætē müincoo wēñacä bai cædinque bitö wæætē tōmancoo müincoo badömi ongongæimpa. Bitö inömö do bitö ingaï bai adobaï cöwē inguïmi imipa. Bitö quëwenguïmämo cöwē inguïno anguënë.”

¹³Äninque Wængongui tömengä Wengä ingante iïmaï angacäimpa.

“Botö tömēmä inö tæ contate ongönömite, botö bitö imite nē piïnte cädäni inānite bæ tabo tæ wæænāni ate bitö tæi emömi inte pinä gawate bai godö cæbi wæcädänimpa,” angacäimpa.

Tömengä Wengä ingante mänömaïno ante nē angaingä inte Wængongui dicæ anquedoidi inānite adobaï angantawogaa. ¹⁴Iñämpa Wængongui anquedoidi inömö baö ömaadäni inte Wængongui beyä nē waa cädäni inānipa. Mänömaï inönānite tömengä, Botö æmo beyænque nē quëwēnāni beyä munitö godö cæcæminimpa, ante da pönongä pöninque tömēnāni mönō beyä pönö waa cädänipa.

Wængongui ængä beyænque quëwēmopma, ante

2 ¹Mänömaï beyä mönō Awënë apäncä eñēninque mönō eñengainö ante mönō ñimpo cädämaï inguinque ante mönō wede pönente ædæmō eñente cæcæimpa. ²Edæ anquedoidi incä Wængongui beyä apäneyönāni tömēnāni nāni änö ante dodāni wæætē nē eñente cæquēñēnāni ingadänimpa. Ïninque æcänö wii eñēninque wapiti cæda tömengä nē tente wæquēñengä inongante dodāni nō cædinque pangadänimpa.

³Iñānāni eñēdāni. Wængongui nänö, Quëwencæminimpa, ante

angainō ante æcānō mōnō imonte
tāno apænecantawo, ante pōnēdāni.
Wængonguī Awēnē inongā incæ tānocā
apænegaingā inte, Botō tōmēmo æmo
beyænque quēwencæminimpa, ante
apænegacāimpa. Ayæ Wængonguī nānō
apænegaingō ēñente Ao āninqe wadāni
godōmenque mōnō imonte, Nāwangā
impa, ante apānedāni ēñēnimō inte
mōnō ædæmō ēñengæimpa. Edæ
ēñēnāmaī inte bai ñimpo cæmō ininqe
Wængonguī dicæ pānāmaī inte ata
cæpocampa quēwenguimōō.

⁴ Ìninqe, Quēwencæminimpa, ante
nāwangā botō ānō ante ēñencædānimpā,
ante cædinque Wængonguī godōmenque
cægacāimpa. Tōmengā, Æcānō tōnō
cæquimoo, ante, Æyōmōnō cæquimoo,
ante, Æyedēnō cæquimoo, ante nāmā
nānō angainō bai cædinque ïimaī pōnō
cægacāimpa. Tōmengā, Botō mā cæbo
ate waodāni ēñencædānimpā, ante
nanguī cægacāimpa. Ayæ, Æbānō
cæcāā, ante wæcædānimpā, ante tæī
piñæninqe wadō wadō cædinque
bamōnengæ edæ nanguī cægacāimpa.
Tōmengā Ònōwoca ingante da
pōnongā pōninqe tōmengā wæætē
Wængonguī nānō angaināni inānite
pōnō cæcā æninqe tōmēnāni tōmānāni
Wængonguī Ònōwoca nānō pōnongā
ænganca cægadānimpā. Ìninqe
Wængonguī mānōmaī pōnō cæcā adimō
incæ mōnō ēñēnāmaī cæmō bai tōmengā
wæætē mōnō imonte ædō cæte ata
cæpoquēnengāā.

**Itota Codito tōmengā tōniñadāni
bai adobai bagacāimpa**

⁵ Ayæ miinguiipoga Awēnē nempo
mōnō quēwenguimāmo ante
apænemōnipa. Ìninqe miinguiipoga
mōni ānonguiipoga Wængonguī,
Æcāmenque ingante āmo awēnē
baqingā, ante cædinque, Anquedoidi
incæ awēnēidi bacædānimpā, ante
dicæ angantawogaa. ⁶ Wacā wataa
yewæmōninqe ïimaī ante Wængonguī
ingante āmotamini ante bai
yewæmongacāimpa.

“Wængonguī ēñēmi. Waomōni
ōnōmōnique ïñōmōnite bitō ædō
cæte waadete cæbii.

Wao wēmōni ēñagaīmōni ïñōmōnite
bitō ædō cæte pōnō waadete
cæbii.

⁷ Anquedoidi inānite æmonga
ææntodōninqe bitō waocā
ingante gao wænō gō cæbi ate
tōmengā wantæ ïñō pōnōmenque
ongongantapa.

Ayæ, Waocā nē tæī emōnongā
inte ñāō emōñongante
wadāni tōmengā ingante
waa acædānimpā, ante pōnō
badongabiimpā.

⁸ Edæ bitō badongaincoo tōmancoo
waocā nempo pōnōmi æninqe
waocā tæī emōngā inte nē angā
bagacāimpa.”

Ante nānō yewæmongaine bai
cædinque Wængonguī tōmengā nānō
badongaincoo tōmancoo Waocā nempo
pōnongā æninqe Waocā nē angā
bayongā wacoo wayōmō ongoncoo edæ
dæ ampa. Incæte, Tōmengā nempo
tōmancoo do ongompā, ante mōnō
ñōwo ganca ayæ adāmaī imompā.

⁹ Doyedē mōnō waocabo ïñōmonte
Wængonguī waadete pōnō cædinque
Itota ingante angā ēñēninqe tōmengā
wæætē mōnō tōmāmō wænguimāmo
beyæ ante cōwē wæwocate wæqingā
bagacāimpa. Mānōmaī cædinque
Wængonguī anquedoidi inānite æmonga
ææntodōninqe, Itota wæætē caate
wæncæcāimpa, ante cædinque tōmengā
ingante gao wænō ïñōmō gōnongā
ongongacāimpa. Incæte Itota caate
wængā beyæ Wængonguī poganta tæiyæ
waēmō da wencate bai cædinque, Itota
nē tæī emōnongā inte ñāō emōngā
adinque wadāni tōmengā ingante waa
acædānimpā, ante pōnō cægacāimpa.
Ìninqe Itota Tæiyæ Awēnē wencate
ongongā ingante do amompā.

¹⁰ Tōmancoo nē badongaingā
inongā inte Wængonguī tōmancoo nē
ēnempodongā inte ïimaī angacāimpa.
Botō Wēmi ēñēmi. Wadāni incæ botō

wēnāni nanguī ināni quēwencādānimpā, ante nē badōmi bitō baquinque caate wæcæbiimpā. Mānōmaī caate bitō wædō beyænque ædæmō picæmi bate nē ēñēnīmi inte bitō botō wēnāni inānite nāō iñōmō ænte māmōmi poncādānimpā. Pōnīnque tōmēnāni botō nāō ēmōmo baī adobaī nāō ēmoncādānimpā, ante Wængonguī nō pōnī cægacāimpā. ¹¹Itota mōnō imonte, Tæiyæ waēmō ewocate quēwencæminimpā, ante nē badongā iñongā mōnō tōmengā tōnō adomō mōnō cabo imompā. Mānōmaī imō beyæ tōmengā mōnō imonte ante apænedīnque, Botō tōniñamīni imīnīpā, ante guīñēnedāmaī tedecampā. ¹²Iīmaī ante apænecampā.

“Wængonguī ēñēmi. Bitō ēmōwo ante botō tōniñadāni inānite apænebo ēñencādānimpā.

Tōmēnāni godongāmæ ongonte ēñēñōnāni botō, Wængonguī iñōmō Tæiyæ Waēmō inongā inte waa pōnī cæcā abopa, ante āmotamīni ante baī ancæboimpā.”

¹³Ayæ adobaī apænedīnque,

“Wængonguī ingante botō wede pōnente quēwencæboimpā,” angacāimpā.

Ayæ wæætē adobaī apænedīnque,

“Wængonguī botō imote apænedīnque, Bitō wēnāni, ante pōnongā ænōmo inte botō, Mōni wencabo mæ ongōmōni aedāni, āmopa.”

Itota incæ Wængonguī beyæ nāni yewæmongainō baī adobaī apænecampā.

¹⁴Mōnō wænguimāmo ante wēnæ awēnē incæ nē angā iñongante Itota, Botō nāñe wænīnque tōmengā ingante edæ omæe ewencæboimpā, ante iīmaī cægacāimpā. Mōnō Itota wēñæmō inōmō inte mōnō baō tōnō wepæ ñōmænguīñō ēñāmō baī tōmengā nānō wænguinque adobaī ñōmænguīñō ēñagacāimpā. Iñīnque tōmengā nāmā nānō wænō beyænque wēnæ awēnē ingante bæ tacā ate tōmengā wæætē piñænāmaī aquīī bate nē angā ināmaī ingampā.

¹⁵Ayæ wēnæ awēnē nempo nā cæyænte baī quēwēnīnque mōnō wænguimāmo ante guīñente wæyōmonte Itota mōnō beyæ ante wæætē wænīnque mōnō imonte gā pe æmpote ò ængā beyænque quēwēmompā.

¹⁶Edæ wīī anquedoidi inānite ænte pæ mancæte ante cædinque tōmengā wæætē Abadāō wodi pæimō iñōmonte mōnō imonte pōnō ænīnque pæ mangampā.

¹⁷Mānīnō beyæ Wængonguī, Bitō tōniñadāni baī adobaī badīnque bitō, Wængonguī quī, ante nē nō Pōnōmi Nænāmī pōnī incæbiimpā. Ayæ bitō tōniñadāni inānite cōwē pōnēnīnque waadete pōnō waa cædinque ædæmō aacæbiimpā, ante tōmengā ingante da pōnongā pongacāimpā. Ayæ adobaī, Bitō tōmēnāni wēnæ wēnæ nāni cædō beyæ nāmā wepæ godoncæbiimpā, ante cædinque Wængonguī Itota ingante da pōnongā pōnīnque tōmengā mōnō ēñāmō baī adobaī ēñadīnque waomō mōnō inōmō baī adobaī badīnque Waocā inongā ingacāimpā. ¹⁸Mōnō inguipoga quēwēnīnque wēnæ wēnæ mōnō cæinēnō beyæ wæwēmompā. Wēnæ awēnē, Itota oda cædinque Wængonguī ingante ēñēnāmaī cæcæcāimpā, ante cæyongā Itota iñōmō mōnō wæwēnō baī adobaī wæwengā incæte oda cædāmaī ingacāimpā. Iñīnque wēnæ wēnæ cæinente wæwēñōmonte tōmengā adobaī do wægaingā inte, Mīnitō tæī piñænte ongōnīnque oda cædāmaī incæminimpā, ante pōnō tōō æmænte cæcampā.

Itota Nænængā iñongā Mōitee wodi wædangā ingacāimpā

3 ¹Mōnitō imōnite aa pedīnque Wængonguī mīnitō imīnite adobaī aa pedīnque, Tæiyæ waēmō entawencæminimpā, ante badongacāimpā. Iñīnque botō tōniñamīni ēñēedāni. Itota iñōmō Wængonguī nānō nē da pōnongaingā ingacāimpā, ante mōnō pōnēnō ante mōnō, Nāwangā impā, ante apænemompā. Ayæ, Wængonguī quī, ante nē Godongā Nænængā pōnī iñōmō

Itota adocä ingampa, ante mönö pönönö ante, Näwangä impa, ante apänemompa. İnnique mınıtö guıquënë, İtota äbänö ingacäimpa, ante önöwënenque pönente quëwenguënëmını imınıpa.

²Wängonguı angä ëñëninque Möıtee wodi guıquënë tömengä ingante cöwë pönente cädinque Wängonguı tönö nani godongämä quëwencabo inänite ädämö cæte aagacäimpa. Tömengä nö cæte nänö aagai bai adobai cädinque İtota İñömö Wängonguı angä ëñëninque tömengä ingante cöwë pönente cädinque tömengä tönö mönö godongämä quëwencabo imonte ädämö cæte aacantapa.

³Edæ, Oncö waa ongompa, ante waa amö incæ mönö oncö nê badöningä ingante godömenque waa ate apänecäimpa. Adobai, Möıtee wodi nê waa aacä ingacäimpa, ante tömengä ingante waa amö incæ mönö edæ İtota nê badongaingä ingante godömenque nanguı waa ate apänecäimpa. ⁴Waocä oncö guıquënë wıı tömenque ongompa. Edæ waocä mänongä ate oncö edæ ongö aminıpa. Inguıpo incæ adobai öönæde ongoncoo adobai wıı tömenque ongoncoopa. Mänincoo tömancoo Wängonguı nänö badongaincooque ongoncoo acäimpa. ⁵Möıtee wodi guıquënë Awënë Wängonguı ingante nê cæcä inongä inte tömengä tönö nani godongämä quëwencabo inänite cöwë pönëninque ädämö cæte aagacäimpa. Mänömaı cädinque tömengä, Wängonguı äbänö İncayä ate apänëquingä, ante odömöninque, Näwangä impa, ante apänëgacäimpa. ⁶Mönö Codito guıquënë Wämpocä Wengä Onguıñängä inongä inte Wämpocä tönö nani godongämä quëwencabo inänite cöwë pönente nöingä pönı cæte pönö aacampa. Edæ mönö guıquënë, Codito waa pönı pönö cæcä beyænque watapæ bacäimpa, ante mönö pönönö ante wadani ëñëñöni waa tote apänemompa. İnnique mönö guıñänämaı inte mänıñö mönö pönönö ante ädämö entawëninque

İnnique baganca ñimpo cädämaı İmö İnnique tömengä tönö mönö godongämä quëwencabo İmaımompa.

**Wängonguı quınäni nani
guëmanguımämo ante**

⁷Mänömaı beyä Wängonguı Tëiyä Waëmö Önöwoca nänö angainö ante mönö ëñente cæcäimpa. Tömengä nänö apänëgainö ante İımaınö ante yewämongatımpa.

“Nöwoönæ incæ tömengä apänecä ëñëninque,

⁸mıñıtö, Mımö ömæde bawëñämaı incämönımpa, ante cädinque Baa änämaı İedäni.

Dodäni İñömö, Wıdo cæcäimpa, ante nani önömæca quëwente cæyedë, Wängonguı ingampa diyä panguingä, ante pönëninque wiwa cægadänımpa. Mänömaı cädinque tömëñäni Baa ante mımö ömædëñäni nani bawengai bai mınıtö adobai bawëñämaı İedäni.

⁹Mıñıtö mämmäıdi mäñıñömö quëwëninque botö imote wiwa cädäni wægaboımpa.

İncæte botö mäñıñedë coadenta wadepo İñönte waa cæbo agadänımpa.

¹⁰Mäñıñedë quëwëñäni mäñömaı cädäni beyä botö tömëñäni İñänite pıınnıque İımaı angaboımpa.

‘Botö taadö goquënëñäni incæ taadö cöwë adämaı İñäni inte tömëñäni ancaa oda cädinque mımö ömædëñäni inte bai wadö godänıpa.’

¹¹Ännıque botö ænguı badınque, Botö nê Quëwëmo ingaımo inte nöingä ämopa, ännıque,

Guëmædäni, ante botö angaiñömö tömëñäni cöwë guıte guëmänämaı incädänımpa, angaboımpa.”

Ante Wängonguı nänö angainö ante yewämongadänımpa.

¹²İñänäni ëñëdäni. Mını pönencabo İñöminite mınıtö wacä ingä wacä ingä

waa adinque adocanque incæ mimö
 ömædengä badämaï incæcäimpa, ante
 wææ aædäni. Ayæ adocanque incæ
 wænæ wænæ entawengä badinque wiya
 æmænte Wængongui nê Quëwengä
 ingante ëmö cæte godämaï incæcäimpa,
 ante wææ aædäni. ¹³Nöwoönæ, ante
 nê angä nänö angaiönæ iñömö ayæ
 ñöwo ganca ëönæpa. Ìninqe minitö
 ñöwoönæ incæ wacä ingä wacä ingä
 ædæmö apænedinque, Æcämenque incæ
 wîwa nani cædö beyænque oda cæte
 wædinque mimö ömædengä badämaï
 incæcäimpa, ante cædinque iimö iñö
 iimö iñö godongämæ iñacabo cædinque
 tæi ongödäni. ¹⁴Edæ mönö wëenëñedë
 wede pönengamöimpa. Nöwo adobaï
 pönëninque iinque baganca wede
 pönëmö ininque mönö Codito nempo
 godongämæ quëwëmaïmompä.

¹⁵Ìninqe adode ante pönente
 cæcæïmpä.

“Nöwoönæ incæ tömengä apænecä
 ëñëninque minitö, Mönitö
 mimö ömædëmöni bawënämaï
 incæmönimpa, ante wææ
 cædinque Baa änämaï iedäni.

Edæ dodäni, Wido cæcæïmpä, ante
 cædinque edæ Baa ante mimö
 ömædënäni nani bawengaï bai
 minitö adobaï bawënämaï iedäni.”

¹⁶Wængongui angä önömoncaque
 ëñëninque, Wido cæcæïmpä, ante
 ædänidö cægadäni. Edæ Möitee wodi
 Equitobæ nänö nê ænte gogaïnäni
 adodäni incæ, Wido cæcæïmpä, ante
 cægadänimpa. ¹⁷Ayæ adobaï Wængongui
 coadenta wadepo iñonte ædänidö
 inänite piininqe ængui bagacäi. Edæ
 nê ëñënämaï inte wænæ wænæ cædäni
 inänite Wængongui piinte ængui bacä
 ate tömënäni baö ingai önömæca
 yabæque wæænte öñongatimpa. ¹⁸Ayæ,
 Pö guite guëmædäni, ante botö
 angaiñömö cöwë guite guëmänämaï
 incædänimpa, ante Wængongui, Botö
 nê Quëwëmo inömo inte nöingä
 angaboïmpä, angacäimpa. Edæ ædänidö
 inänite mänömaï angacäi. Edæ nê
 ëñënämaï cædäni inänite mänömaï

angacäimpa. ¹⁹Ìninqe nê pönënämaï
 inäni inte tömënäni nani pönënämaï inö
 beyænque guidämaï ingadänimpa.

4 ¹Botö nempo guidinque
 guëmancæminimpa, ante
 wëenëñedë nänö angainö ante
 Wængongui ñöwo incæ adodö ante
 cöwë angampa. Mänömaï beyæ mini
 pönencabo tömämini tömengä
 nempo guidinque guëmanguënëmini
 iñöminite adocanque incæ oda
 cædämaï incæcäimpa, ante cædinque
 mönö godongämæ waa adinque wææ
 aacäimpa. ²Edæ dodäni inänite
 Wængongui ingantedö ante watapæ nani
 apænëgainö bai mönö imonte adobaï
 ante watapæ apænëdäni ëñëmompä.
 Incæte dodäni guiquëñë önömoncaque
 ëñëninque wede pönënäni beyænque
 guëmänämaï inte wægadänimpa.
³Mönö nê wede pönëmö imö guiquëñë
 Wængongui nempo guidinque mimönë
 do guëmämompä. Edæ Wængongui
 nempo mönö guëmanguënënö ante botö
 äninta adotaa iimainö ante yewæmonte
 ongö bai batimpa.

“Botö ængui badinque, Botö nê
 Quëwëmo ingaimo inte ämopa,
 äninque,
 Pö guite guëmædäni, ante
 botö angaiñömö tömënäni
 cöwë guidämaï incædänimpa,
 angaboïmpä.”

Ante Wængongui beyæ ante
 yewæmongadänimpa. Incæte doyedë
 inguipoga iï ëmönæ badöninque
 Wængongui tömengä nänö cæquënënö
 ante iinque badöninque, Idæwaa,
 angacäimpa. ⁴Wængongui önömpo
 æmæmpoque go adoönæque iñonte
 iinque cædinque iimö wæiyö nänö
 guëmangaiönæ ingatimpa, ante iïmaï
 ante wataa yewæmonte ongompä.

“Önöpmpo æmæmpoque go
 adoönæque iñonte iinque
 cædinque iimö wæiyö ñimpö
 cædinque Wængongui
 guëmangacäimpa.”

⁵Ayæ botö äninta adotaa iïmaï ante
 yewæmonte ongompä.

“Pō guite guēmædāni, ante botō
 āñōmō tōmēnāni cōwē guidāmai
 incædānimpā,” angampā, ante
 yewæmongatimpā.

⁶Īninqwe Wængonguī nānō pōnō cædō
 ante watapæ ante apænecā ēñēninqwe
 dodāni iñōmō ōnōmoncaque ēñēnāni
 inte tōmēnāni nāni ēñēnāmai cægainō
 beyæ guidāmai ingadānimpā. Īninqwe,
 Wængonguī tōmengā nānō angainō
 iinqwe cæcæimpā, ante cædinque
 iincayæ quēwēnāni pancadāniya cōwē
 guiquēñēnāni inōnānimpā. ⁷Mānōmai
 beyæ, Æōnædō ēñenguēñēmīni ĩmīni,
 ante odōmoncæte ante cædinque
 Wængonguī, “Ñōwoonæ,” ante awēnē
 Dabii ingante wantæpiyæ ate apænecā
 ēñengacāimpā. Īninqwe mānīnō
 botō do ante yewæmōmo mīni adīnō
 baī ante Dabii wodi ĩmaīnō ante
 yewæmongacāimpā.

“Ñōwoonæ incæ tōmengā apænecā
 ēñēninqwe mīnitō, Mīmō
 ōmædēmōni bawēnāmai
 incæmōnimpā, ante cædinque
 Baa ānāmai iedāni,” ante
 yewæmongacāimpā.

⁸Edæ docā Ootowee wodi tōmēnāni
 inānite doyedē manguicā guidinque
 Cānaāmæ quēwengadānimpā. Incæte
 tōmēnāni māniōmæ do guidiñāni
 inte nāwangā guēmānāni baī
 Wængonguī iincayæ ate, Ñōwoonæ
 guēmancæmīnimpā, ante wæætē
 ānāmai incædongāimpā. ⁹Īninqwe
 mōnō Wængonguī quīmō iñōmō edæ
 guēmanguiōnæ guēmante baī mōnō
 tōmengā nempo quēwēninqwe mīmōnē
 guēmāninqwe cætawente wædāmai
 ingæimpā. ¹⁰Wængonguī iinqwe
 badōninqwe tōmengā nānō cæquēñēnō
 tōmāā cædinque ñimpō cædinque
 guēmangacāimpā. Tōmengā nānō
 ñimpō cæte guēmangā baī waocā
 iñōmō Wængonguī nempo guidinque
 nē guēmangā iñōmō adobaī tōmengā
 nānō cæquēñēnō ante, Tōmānō do
 cætimpā, ante adinque ñimpō cædinque
 guēmangampā. ¹¹Dodāni nāni
 ēñēnāmai cægā baī ñōwodāni adobaī

cædāni ĩninqwe tōmēnāni nāni tæ go
 wæænguinqwe cæbainānimpā. Mānōmai
 ĩ ĩninqwe, Adocanque incæ mānōmai
 cæte tæ go wæænāmai incæcāimpā,
 ante wææ cædinque mōnō tōmāmō,
 Wængonguī nempo guite mīmōnē
 guēmangæimpā, ante nanguī cæcæimpā.

¹²Wængonguī nānō ānō iñōmō
 mīine quēwēne inte tæi piyænē
 ēnepa. Edæ yaēmē yægāmē tipængaa
 engamē bamencaa guiibæ watii co baī
 Wængonguī nānō ānō iñōmō adobaī
 cædinque mōnō ōnōwoca incæ do cote
 baī guiipa. Ayæ bamē tadōmengadæmē
 tæi guiñænte bamii edonque a baī
 Wængonguī nānō ānō iñōmō adobaī
 mōnō mīmō incæ tadōmengadæ tæi
 guiñænte baī cædinque mōnō pōnēnō
 ante mōnō cæinēnō ante do edonque
 ba adinque adode incæ apænte baī
 ampa. ¹³Wængonguī nē apænte ānongā
 iñongante mōnō nāmā incæ, Æbānō
 cægāmōnii, ante tōmengā ingante
 tōingā apænequēñēmō ĩmōmpā. Edæ,
 Wængonguī ayongā tōmengā nānō
 badongaincoo tōmancoo edæ gā
 ængate ōmægacoo baī inte wodōnāmai
 ongōmpā.

Wængonguī ingante nē Godongā Ñænængā Itota ingampā

¹⁴Mōnō beyæ, Wængonguī qui, ante
 nē Godongā Ñænængā pōni iñōmō
 Wængonguī Wengā Itota ingampā.
 Tōmengā iñōmō nāmā wepæ godonte
 do wængaingā inte ñāni ōmæmōninqwe
 ōnædē æite ongongampā. Īninqwe
 mōnō, Tōmengā ingante wede
 pōnēmōnimpā, ante nē apænemō inte
 mōnō wede pōnēnō ante ædæmō pæ
 mangæimpā. ¹⁵Wængonguī qui, ante
 mōnō beyæ nē Godongā Ñænængā pōni
 inongā iñōmō wēnæ wēnæ cædāmai
 ingacāimpā. Incæte aquīi ĩmō inte
 wæmō adinque tōmengā wæætē, Botō
 Waobo ēñadinque aquīi bate wægaimo
 inte, Aquīi mīni wædō æbānō ĩ, ante
 do edæ ēñēmōpā, angampā. Edæ wēnæ
 awēnē tōmengā ingante, Wēnæ wēnæ
 cæe, angā do wægailingā inte tōmengā

mönö wənæ wənæ cæinönö, Æbänö i, ante do ëñengampa. ¹⁶ Ìninqe mönö Awënë iñömö nangui waadete pönengä inte Awënë containpaa ongongampa cæmöö. Mönö wənæ wənæ cædinö ante tömengä pönö ñimpo cæcæcäimpa, ante cædinque mönö tömengä weca ponte apænecæimpa. Mönö caate wæyedë tömengä pönö töö æmænte cæcæcäimpa, ante mönö tömengä weca ponte apænecæimpa. Mänömaï Awënë ongompaa gäänë pöninque mönö guiñênämaï inte apænemö ëñëninque tömengä waadete pönö waa cæcä ængæimpa.

5 ¹ Wængongui quï, ante bitö botö imote nê pönömi ñænæmi pönï bacæbiimpa, ante æcänö ingante Wængongui angä bacää.

Edæ waocä adocanque ingante apænte æninque Wængongui angä ate tömengä iñömö nê waocä inongä inte waodäni beyæ Wængongui weca cæcampa. Ìninqe waodäni iingä weca pöninque, Wængongui quï, ante pædæ pönönäni æninque tömengä wæætë Wængongui ingante godongampa. Ayæ, Wənæ wənæ cæmöni incæte Wængongui waadete pönö ñimpo cæcæcäimpa, ante cædinque waodäni, Wængongui quï, ante cæningä ænte pöninque pædæ pönönäni ængampa. Æninque nê godongä ñænængä iñömö nê waocä inongä incæte cæningä ingante ænte wænöninque nê ænte pönäni nani wənæ wənæ cædinö beyæ ante baö iya tangampa. ² Ìninqe wadäni, Æbämë impa, ante ëñênämaï nani wædö ante nê godongä ñænængä iñömö nê waocä inongä inte adobai panca ëñênämaï inte wæcampa. Ayæ oda cæte nani wædö ante tömengä adobai oda cæte wæcampa. Ìninqe wadäni bai aquïingä inongä inte tömengä gänë pönëninque wadäni inänite ædæmö cæte odömongä adänipa. ³ Mänömaï inongä inte tömengä wadäni wənæ wənæ nani cædinö beyæ ante, Wængongui quï, ante iya täninque adobai, Botö nämä wənæ wənæ cædinö beyæ godömopa, ante iya tante Wængongui ingante godongampa.

⁴ Waocä nämä incæ, Botö, Wængongui quï, ante nê godömo ñænæmo bayömote wadäni botö imote waa acædänimpa, ante ædö cæte anguingää. Ìñæmpa Wængongui angä beyænque Aadöo wodi nê godongä ñænængä bacä bai wadäni adobai Wængongui angä beyænque nê godönäni ñænænäni badänipa. ⁵ Codito incæ, Nê godömo ñænæmo badinque nê tæi ëmömo inte ñäö ëmömo acædänimpa, ante nämä ante wïi angacäimpa. Wængongui incæ tömengä ingante,

“Bitö botö Wëmi inömi imipa,

Ñöwoönæ bitö Wæmpobo babopa.”

⁶ Angacäimpa. Ayæ godömenque Wængongui nänö angainö ante wataa yewæmongatimpa.

“Wængongui quï, ante nê pönongä Mëequitedeco nänö cöwë ingai bai, bitö adobai ñimpo cædämaï inte nê Pönömi cöwë incæbiimpa,” ante Codito ingante angacäimpa.

⁷ Codito iñömö Waocä ëñate quëwëninque Ca ca wædinque Yæ yæ äninque Wængongui ingante nangui apænecäimpa. Wængongui bitö adobique eyepæ imi inte wææ ämi ininqe botö wænämaï imaimopa, angacäimpa. Incæte, Bitö, Wæe, ämi ate botö wæncæboimpa, ante nänö Ao äninö beyænque Wængongui tömengä ingante do ëñengacäimpa. ⁸ Wæmpocä Wëñængä inongä incæte Itota nänö caate wæwëmämo beyænque Wængongui nänö änö ante ædæmö ëñente cædinque picængä bagacäimpa. ⁹ Tömengä nänö änö ante nê ëñente cædömo iñömonte tömengä ædæmö ëñëninque picængä bagingä inte edæ mönö imonte ængä beyænque mönö cöwë wænämaï inte quëwëmompä. ¹⁰ Tömengä ingante Wængongui apænte æninque, Mëequitedeco nê pönongä ñænængä pönï nänö ingai bai bitö adobai botö imote nê Pönömi Ñænæmi pönï inömi imipa, angacäimpa.

**Mönö wede pönönö ante Baa
änämaï ingæimpa, ante**

¹¹ Mäninö ante botö mïnitö imïnite godömenque nangui apænecquënemo

imopa. Incæte, Ætiquedö ēñenguimīnii, ante pōnente wædinque botö, Æbänö cæte apænebo ēñenguimīnii, ante wæbopa. ¹²Īñæmpa mīnitö doyedē mīni ēñengainö ante ñowo nē odömōmīni baquēnēmīni īmīnīpa. Incæte wacā wæætē mīnitö īmīnīte Wængonguī nānō angainö ante adodeque adodeque ante odömōnte apænecā ēñenguēnēmīni adodö bamīni awädö. Edæ wēñænāni nē goömæ gānāni bai wæætē bamīni īñōmīnīte botö ædö cæte tæēmö cænguī godōnte bai apænebo ēñenguimīnii. ¹³Goömæ nē gangā bai ingā īñōmō tömengä wēñængä bai īñongante mōnitö, Æbänö nö cæquīī, ante odömōnte apænemōni incæte tömengä īñōmō cōwē ēñēnāmaī ingampa. ¹⁴Wæætē æcānō cōwē waa cæda īna īñōmō tömengä, Quīnō waa īī, ante, Quīnō wēnæ wēnæ īī, ante wæætē wæætē ante cædinque do ēñente badinque picængä bai bacampa. Īnīnque ædæmō picænāni nē badāni beyænque mōni nö odömōnte apænedö īñōmō cænguī tæēmö bai ongompa.

6 ¹Mönö Codito inguipoga quēwēnīnque æbänö cægacāī, ante do ēñēmōmpa. Mönö wænguīnō goquinque wēnæ wēnæ cæmōmpa, ante wædinque, Idæwaa wēnæ wēnæ cætabopa, ante mönō Wængonguī gāmæñö æbänö cæte ocæ ēmænte ponguīī, ante do ēñēmōmpa. Tömengä ingante æbänö cæte pōnenguīī, ante do ēñēmōmpa. Īnīnque mānīnō tömānō ante do ēñēnīmō inte mönō mānīnō ante idæwaa tedetamōmpa. Wæætē, Æbänö cæte godōmenque picæmō bai ēñente baquīī, ante mönō ñowo apænecæīmpa. ²Adobai, Æpænē quīnante guīquīī, ante, Önompoca quīnante godö gampoquīī, ante do ēñēmō inte mönō mānīnō ante godōmenque tededāmaī ingæīmpa. Ayæ, Wænte ate ñāni mönō ömæmongæīmpa, ante do ēñēmō īnīnque, Wængonguī cōwē apænte ancæcāīmpa, ante do ēñēmō īnīnque mönō mānīnō ante ñowo godōmenque tededāmaī ingæīmpa. ³Īnīnque Wængonguī Ao angā ate botö mānīnō mīnitö do ēñēnīnō ante

tededāmaī incæboīmpa. Mīnitö ēñēnāmaī īnīnō ante wæætē nangui apænebo ēñencæmīnīmpa.

⁴Wængonguī mönō mīmōnē pōnō tica ēnente bai cædinque edonque odömōnte apænecā ēñēnīnque mönō ñāö bai entawēmōmpa. Tömengä öönædē waa pōnī nānō da pōnongaincoo do ænte quēwēmōmpa. Ayæ tömengä Tæiyæ Waēmö Önōwoca ingante da pōnongä ænīnque mönō tömengä tönö āanque bai ewocamōmpa. Mānōmaī ewocamō incæte pancadāniya wadæ godāni inte edæ ædö cæte, Wēnæ wēnæ cæte awädö, ante ocæ ēmænte ponguīnāni. ⁵Tömēnāni īñōmō, Wængonguī nānō änō waa pōnī impa, ante do ēñēnīnāni inte ayæ, Wængonguī mīnguīpo nānō badōñedē mānīñedē mīīmāmoque ba ate tæī pīñænte cæcæīmpa, ante do ēñēnānīpa. ⁶Incæte mānīnō nāni wede pōnēnīnō ante Baa ante wadæ godāni bai tömēnāni edæ ædö cæte īincayæ ate, Idæwaa wēnæ wēnæ cæte awädö, ante ocæ ēmænte ponguīnāni. Īñæmpa dodāni Wængonguī Wengä ingante awæ timpote wænōnāni bai cædinque īīnāni wæætē tömengä ingante adodö wænōnte bai cædānīpa. Ayæ tömēnāni nāni æmæwo ewente wæquinque tömānāni ayōnāni Wængonguī Wengä ingante badete tote bai cædānīpa.

⁷Edæ cōönæ wantæ wantæ cæ ate waodāni cōñe inguipoga tömēmō quiyadāni wææ pæte incapa. Incate amīmō ba ate nē quiyadānīni nangui tā pete eyepæ ænāni īnīnque Wængonguī wæætē onguīpo tömengūpo waa pæ ate adinque, Waa pæguīpo abopa, angampa. Adobai tömengä nānō änō ante wantæ wantæ īñö apænedāni ēñēnīnque waodāni gāñē pōnēnāni badinque wadāni inānīte waadete cædāni ate Wængonguī mānīnāni inānīte, Mīnitö waa ēñente cæmīni abopa, ante pōnō waa cæcampa. ⁸Ömentacooque pæguīpo daacamenque pæguīpo guīquēñē nānō æmæwo tante ewengūnīnque önonguīpoque impa. Mānguīpo iya tanguī bai waocā adobai Wængonguī

nänö änö ante në Baa angä iñömö tömengä nänö ämæwo ewenguinque Baa angampa.

Watapæ bacæimpa, ante pönëninque tæi ongömompa

⁹Iñänäni ëñeedäni. Wadäni mänömaï inäni, ante yewæmömöni incæte mönitö ayömöni minitö wiï tömënäni bai imini amönipa. Wæætë Codito ængä beyænque në quëwenguimïni inömïni inte minitö cöwë waa cæmïni imini amönipa. ¹⁰Edæ minitö cöwë waa cædinque Wængongui ingante waadete pönëninque tömengä quinäni beyä godö waa cægaimïni inte ñowo godömenque cæminipa, ante adingä inte Wængongui dicæ mïni cædö ante pönënamai inguingä. Wæætë në nö cædongä inte tömengä mïni cædö ante cöwë pönengampa. ¹¹Codito beyænque watapæ bacæimpa, ante minitö wede pönëmïnipa. Inique minitö mäninö mïni wede pönëno ante iinque baganca wede pönecæte ante cædinque mïni waadete pönö cægainö bai adobai iinque baganca cöwë cædäni, amönipa. ¹²Edæ në wede pönënäni wæntæye inämai inäni iñömö edæ Wængongui, Pönömo æedäni, ante nänö angaincoo cöwë æncædänimpa. Minitö iñömö, Tömënäni æbänö cædäni, ante adinque tömënäni nani cædö bai adobai cædinque wæntæye inämai inte Wængongui nänö angaincoo adobai æncæminimpa, amönipa.

¹³Wængongui, Botö änö bai cöwë cæcæboimpa, ante Abadäo wodi ingante angacäimpa. Mänömainö ante näwangä impa, ante Abadäo ëñencæcäimpa, ante cædinque tömengä, Wacä ëmowo godömenque tæi piñængä ëmowo ante apænebo ëñëninque do ëñencæcäimpa, ante cæyongante wacä në tæi piñængä guiquënë edæ dæ angacäimpa. Inique Wængongui iñömö nämä ëmowo ante apænedinque, Wængonguimo në Quëwëmo inte nöingä ante ämo ëñëe, äninque iïmai angacäimpa. ¹⁴“Botö bitö imite pönö waa cæbo ate bitö pæinäni

nanguï yebæninque bacoo bacædänimpa. Botö Wængonguimo në Quëwëmo inte ämopa.” ¹⁵Ante do angä ëñengaingä inte Abadäo wodi wantæpiyæ ænämai inte wänö cöñongante Wængongui tömengä nänö angainö bai pönö cæcä ængacäimpa.

¹⁶Wadäni guiquënë, Näwangä ämopa, ante ëñencædänimpa, ante cædinque wacä ëmowo godömenque tæi piñængä ëmowo apænedinque änäni. Mänömai cædinque waocä, Botö godömenque në tæi piñængä tönö guëa cæte bai änimö inte ædö cæte babæ ante wadö cæquimoo, ante bai apæneyongante wacä Ao angä ate tömëna nana guëa cæcaya badapa.

¹⁷Wængongui iñömö, Botö wadö bai änämai inömo inte mänïi botö angainö bai cöwë cæcæboimpa, angacäimpa. Ayæ, Mänömai impa, ante botö angaincoo në ænguinäni ædæmö ëñencædänimpa, ante cædinque Wængongui nämä ëmowo apænedinque, Botö Wængonguimo në Quëwëno inte näwangä ämopa, angacäimpa. ¹⁸Tömengä, Botö pönö cæbo beyænque watapæ bacæimpa, ante nänö angainö ante æncæte ante mönö Wængongui gämænö do wodii winonte pömöimpa. Inique tömengä weca do pönimö iñömönte tömengä wæætë, Mënea beyä mönö watapæ bacæimpa, angampa. Ayæ, Minitö wampo pönëninque edæ botö tönö edæ godömenque cæcæminimpa, ante tömengä ædæmö apænecampa. Mënea ante apænebo ëñëedäni. Botö Wængonguimo inömo inte nämä Wængongui ëmowo apænebo beyä në ëñëmïni inte minitö mänine beyä pönencæminimpa. Ayæ godömenque wade ante, Wængongui incæ ædö cæte babæ wapiticæ anguingä, ante pönencæminimpa. Mänömai Wængongui mënea ante cægacäimpa.

¹⁹Inique wipo gæguincamë inte tæi nänoncadodäni ate wäi wocæ bai mönö iñömö edæ, Mänine mënea beyä watapæ bacæimpa, ante mönö wede pönëno beyä tæi ongömö inte mönö ædö cæte wadæ

goquii. Mönö wede pönëno beyanque edæ Wængongui oncönë weocoo wææ owoyömo tadömengadæncönë guii öönædë ñä cæte bai i inique mönö önöwoca iñömö edæ tæi ongonde bai ewocamompa. ²⁰Itota iñömö täno beyante öönædë æidinque mönö beyæ ante mänincönë do wäänë guiiacäimpa. Iñinque Mëequitedeco nê godongä ñænængä nänö ingai bai badinque Itota, Wængongui quii, ante nämä wepæ nê Godongä Ñænængä pöni inongä inte edæ cöwë ongongampa.

**Mëequitedeco bai Itota nê
Godongä Ñænængä ingampa**

7 ¹Mëequitedeco guiquënë Tadëë nani añömö quëwënanii awënë odeye inongä inte tömengä, Wængongui Æibæ pöni nê Quëwengä quii, ante nê godongä ingacäimpa. Iñongante Abadäo wodi wadäni awënë odeyeidi inänite wänonte pöñongante Mëequitedeco eyepæ pö bee téninque, Abadäo ëñëmi, angantapa. Bitö imite Wængongui pönö waa cæcæcäimpa. ²Ante pönö waa apæneyongante Abadäo iñömö awënëidi wodi nani mangaincoo tömengä nänö ö ænincoo bacoo pöni incoo adinque önompo tipæmpoga mänimpocato cabo ti gæte cö cædinque, Wængongui quii, äninque Mëequitedeco ingante adocatoque pædæ godongä ængacäimpa.

Mëequitedeco nê awënë odeye iñongante tömengä ëmöwo pemonte bai cædinque wadäni, “Awënë inongä inte tömengä nê nö cæcä ingampa,” ante angadänimpa. Ayæ, Tadëë “Gänë pönëñömö” nani angaiñömö quëwënanii awënë odeye ingampa, ante pönëninque tömënanii, “Awënë odeye inongä inte tömengä nê gänë pönengä ingampa,” ante wawo pemongadänimpa. ³Tömengä badä ömaacä ingä bai, tömengä wæmpocä ömaacä ingä bai, tömengä nänö ëñagäionæ ömaacä ingä bai, tömengä nänö wængäionæ ömaacä ingä bai ante dodäni tömengä ingantedö ante yewæmongadänimpa. Mänömai i inique mönö, Wængongui Wengä nänö

cöwë ingai bai Mëequitedeco adobai, Wængongui quii, ante nê cöwë godongä ingampa, ante pönengäimpa.

⁴Tömengä ñænængä pöni ingacäimpa, ante botö iimaï ante apænëbo pönëedäni. Wængongui quii, ante nê godongä ñænængä pöni Mëequitedeco ingampa, ante pönëninque mönö wæmæ Abadäo wodi incæ tömengä nänö ö ænincoo önompo tipæmpoga mänimpocato ongö adinque adocatoque äninque Mëequitedeco ñænængä ingante pædæ godongä ængacäimpa. ⁵Mönö Abadäo wodi pæimö iñömö tömancabomö inömö incæte adocabodäniya mönö töniiñadäni Debiidi pancadäniya guiquënë, Wængongui quii, ante nê godönäni bagadänimpa. Bayönänite Möitee wodi tömënanii inänite iimaï angacäimpa. Minitö töniiñadäni inänite ämini ëñëninque tömënanii wæætë tömënanii nani ænincoo önompo tipæmpoga mänimpocato ongö adinque adocatoque pædæ pönönäni æncæminimpa, ante wææ angä ëñëninque tömënanique, Wængongui quii bacäimpa, ante nê ænani inänipa. ⁶Mëequitedeco guiquënë Debii wodi pæingä inämai ingaingä incæte adocatoque angä ëñëninque Abadäo wodi pædæ godongä ængacäimpa. Do iñömö Wængongui incæ Abadäo ingante apænëdinque, Bitö quii, ante botö cöwë pönömo æncæbiimpa, angacäimpa. Incæte wantæpiyæ ate Wængongui nänö nê angaingä iñongante Abadäo ingante apænëdinque Mëequitedeco iñömö, Wængongui bitö imite pönö waa cæcæcäimpa, ante pönö waa apænëngacäimpa.

⁷Mönö ayömö guiquënë, Ñænënanii inönäni iñömö tömënanique önönänique inänite nê godö waa apænëdäni inänipa, ante do ëñënimö inte mönö wadö ante ædö cæte pönenguüi. Iñinque, Abadäo wodi önonganque iñongante Mëequitedeco nê ñænængä inongä inte edæ mänömai waa apænëngacäimpa, ante mönö edonque ëñëmompa. ⁸Mäninäni Debiidi guiquënë nê ñömæintai ëñadäni

inānīpa. Incæte tōmēnāni inānīte wadāni, Wængonguī quī bacæīmpa, ante adocatoque cōwē pōnōnāni ænānīpa. Īngā Mēequitedeco guiquēnē nōmæintai ēñadāmai bāi ingaingā inte nē quēwengā ingampa, ante yewæmongatīmpa. Tōmengā mǎnōmai nē quēwengā bāi ĩnongante Abadāō wodi tōmengā ingante, Wængonguī quī, ante adocatoque godongā ængacāīmpa.

⁹Mǎnōmai ĩmpa, ante pōnēnīnque botō, Eñencæmīnīmpa, ante nōwo godōmenque yewæmōmo aedāni. Tōmēnāni nāni æñinō ōnompō tipæmpoga ganca mǎnīmpocato ongō adīnque, Wængonguī quī, ante adocatoque pædæ godōñōnāni Debīi nāni pæīncabo incæ nē ænāni ĩnōnānīmpa. Incæte Debīi wodi wæmpocoo ingaingā ĩnongā inte Abadāō wodi adocatoque do godongā ĩnīnque tōmengā pæīngā inguingā Debīi ĩñōmō wæmpocoo tōnō āanque bāi adocatoque do godonte bāi ayæ ate ēñate quēwengacāīmpa. ¹⁰Edæ Abadāō wodi nānō pæīnāni Debīidi inānīpa. ĩnīnque Debīi ayæ ēñadāmai ĩnongante tōmengā wæmpocoo Abadāō wodi ingante Mēequitedeco pō bee tente adocatoque ænīnque Debīi nānō ænguēnencoo incæ pancacooga adobaī ængacāīmpa.

¹¹Wængonguī doyedē angā ēñēnīnque Debīidi pancadāniya, Wængonguī quī, ante nē godōnāni bagadānīmpa. Ayæ Wængonguī, Īmai cædāni, ante angā ēñente yewæmōnīnque Debīidi wæætē wadāni inānīte odōmonte apænedāni ēñengadānīmpa. Incæte Debīidi, Wængonguī quī, ante nāni godōnō beyænque mōnō Wængonguī ayongā mōnō ædæmō pædāni bāi edæ dicæ entawente bamongaa. Īnæmpa mǎnīnāni nāni godōnō beyænque nē picænāni bāi bamō bāi nōwo wacā nē Godongā ingante Wængonguī da pōnōnāmai incædongāīmpa. Ayæ, Wængonguī quī, ante nē Pōnongā incæcāīmpa, ante Codito ingante da pōnōnīnque Wængonguī, Debīi wodi pæīngā Aadōō nānō pōnongāi bāi

Codito adobaī pōnōncæcāīmpa, ante ānāmai inte wæætē, Mēequitedeco nānō pōnongāi bāi cædīnque Codito pōnongā beyænque waodāni botō ayōmō nē nō cædāni bacædānīmpa, angacāīmpa. ¹²Ayæ, Wængonguī quī, ante nāni godoncabo ĩñōnānīte Wængonguī, Idæwaa cæmīnīpa, ānīnque wacā ingante, Bitō wæætē botō ĩmote nē Pōnōmī bacæbīīmpa, angacāīmpa. Ayæ wacā mǎnōmai nē Godongā bacā beyæ Wængonguī, Īmai cædāni, ante nānō wææ angainō ante wēā godonte bāi cædīnque wade ānīnque wææ angā ingacāīmpa.

¹³Īnīnque Wængonguī nōwo, Nē Pōnōmī bacæbīīmpa, ante nānō nē angaingā ĩñōmō Debīidi nāni cabo ĩnāmai inte wæætē wacabocā ĩnongā ingampa. Incæte nōwocā Codito guīdēnāni ĩñōmō, Wængonguī quī, ante nāni ĩya tāīmpaa cōwē godōnāmai ĩnōnānīmpa. ¹⁴Edæ, Wængonguī quī, ante oodaīdi nāni cabo nē godōnāni incædānīmpa, ante Mōitee wodi dicæ angacāīñaa. Incæte, Mōnō Awēnē ĩñōmō Oodaa wodi pæīngā ingacāīmpa, ante edonque acæīmpa.

¹⁵Īnīnque Mēequitedeco nānō ingāi bāi wacā wæætē, Wængonguī quī, ante nē Godongā bacā adīmō inte mōnō godōmenque edonque ēñengæīmpa. ¹⁶Edæ Nōwocā tōmengā mæmæīdi wīi nē godōnāni ingadānīmpa. ĩnīnque, Bitō mæmæīdi nāni godongāi bāi bitō adobaī godonte ēñēe, ante ædō cæte anguīi. Wīi tōmengā mæmæīdi nāni cægai bāi cædīnque tōmengā nē Godongā bagacāīmpa. Wæætē cōwē nē wænāmai Quēwenguingā inte tōmengā nāmā nānō tæī pīñænō beyænque nē Godongā bagacāīmpa. ¹⁷Edæ tōmengā ingante apænedīnque Wængonguī,

“Mēequitedeco, Wængonguī quī, ante nē pōnongā cōwē nānō ingāi bāi, bitō adobaī nīmpo cædāmai inte nē Pōnōmī cōwē incæbīīmpa,” ante apænegacāīmpa.

¹⁸Īnīnque, Īmai cædāni, ante Mōitee wodi wēēñēdē nānō wææ angāīne

incæ aquiīne inte önöneque bai īñonte wëä godonte bai bagatimpa. ¹⁹Edæ Möitee wodi, İimai cædäni, ante nänö wææ angainö ëñente beyænque mönö Wængongui ayongä ædæmö pædäni bai dicæ entawente baquimö. Wængongui wæætë, Codito pönö cæcä beyænque watapæ quëwencæminiipa, ante ñöwo pönö apænecäimpa. İinque, Mänömai impa, ante pönëninque mönö Wængongui weca pömompa.

²⁰Wængongui wii önonque angacäimpa. Wæætë tömengä nämä ëmöwo apænedinque, Botö Wængonguimo në Quëwënonö inte näwangä ämopa, äninque Codito ingante angä ate tömengä wæætë, Wængongui qui, ante në Godongä bagacäimpa. Wæætë wadäni inänite guiquënë tömengä wii nämä ëmöwo apænedinque, Näwangä ämopa, ante änämai ingä incæte tömënnäni önonque, Wængongui qui, ante në godönäni bagadänimpa.

²¹Codito ingante guiquënë Wængongui iīmai ante apænecäimpa.

“Bitö ñimpo cædämai inte,
Wængongui qui, ante në Pönömi
cöwë incæbiimpa.
Ante botö në Tæiyæ Awënë inömo
inte nöingä äninque
iīncayæ ate wadö ante cöwë änämai
incæboimpa.”

²²Wængongui, Itota botö imote në Pönongä inongä inte minitö beyæ cæcä ate minitö Ao ämini ininque mönö godongämæ waa cæcäimpa, äninque Wængongui mönö imonte ñöwo godömenque waa pönü apænecäimpa. İinque Wængongui mänömai nämä ëmöwo apænedinque, Näwangä ämopa, äninque Itota nänö në angäingä iñongante mönö Itota ingante pönëninque, Wængongui nänö angainö bai cöwë cæcäimpa, ante do ëñëmompa. ²³Mäninäni guiquënë në ñömæintai ëñagänäni inte ædö cæte ñimpo cædämai inte Wængongui ingante në godönäni cöwë inguinäni. İinque wii adocanque në godongä ingacäimpa. Wacä wacä në godönäni

bagadänimpa. ²⁴Itota iñömö në wänämai quëwënongä inte tömengä, Wængongui qui, ante në Godongä inongä inte cöwë quëwengampa. ²⁵Edæ tömengä në wänämai Quëwënongä inte Wængongui ingante mönö beyæ ante cöwë apænedinque, Botö bitö gamænö në mämömo pönäni inänite bitö pönö waa cæcäbiimpa, ante ñimpo cædämai inte cöwë apænecampa. Wængongui ingante cöwë apænecä inongä inte tömengä cöwë quëwëninque ædæmö pönö ængä beyænque mönö wæætë cöwë wänämai quëwënguimö imompa.

²⁶Wadäni nani ëñënnämai cæcabo bai wii inongä inte Itota iñömö tæiyæ waëmö inongä ingampa. Wentamö mongänämai inongä iñongante tömengä ingante ædö cæte piinte apænte anguinäni. Mänömai ingä adinque Wængongui tömengä ingante öönædë æmonga pönü ængö cæcä ongongampa. İinque tömengä adocanque pönü, Wængongui qui, ante në nö Godongä Nænængä pönü inongä inte mönö wædö ante eyepæ pönü pönö cæcampa. ²⁷Wadäni në godönäni ñænænäni pönü inäni guiquënë tömënnäni täno godöninque nämä nani wënæ wënæ cædö beyæ ante, Wængongui botö imote waa acæcäimpa, ante cæningä wepæ iīmō iīnō iīmō godönäni. Ayæ ate wadäni nani wënæ wënæ cædö beyæ adobai godönäni. Itota guiquënë wënæ wënæ nani cædö bai cædämai inongä inte nämä beyænque godönämai ingacäimpa. Ayæ wamö mönö wënæ wënæ cædö beyæ wæætë wæætë godönämai inte tömengä eyepæ inongä inte adopoque pönü godongacäimpa. İinque tömengä nämä wepæ godöninque eyepæ pönü godongä adinque Wængongui wæætë mönö imonte waa acampa.

²⁸Möitee wodi nänö wææ angainö ante ëñente cædinque waodäni aquiī inäni nani cabo iñönänite pancadäniya inänite änäni Wængongui ingante në godönäni ñænænäni do badäniya. Wængongui guiquënë iīncayæ ate

nämä emōwo apænedinque, Botō Wengā ædæmō Picængā nē ēñengā bagaingā ingante ämo ate tōmengā nē Pōngōgā Ñænængā bacæcäimpa. Botō Wængonguimo nē Quëwēnōmo inte näwangā ämopa, angacäimpa.

**Wængonguī ñōwo nänō angainō
ante Itota iinque cæcä**

8 ¹Mänōmainō ante quinante yewæmōmōnii. Edæ, Mönō wædō beyæ ante, Wængonguī quī, ante nē Godongā Ñænængā pōnī inte ongongampa, ante, Näwangā impa, ante edonque ēñencæminimpa, ante yewæmōmōnīpa. Tōmengā iñōmō öönædē æidinque Awënë Wængonguī tōmëmængā inō tæ contadinque Tæiyæ Awënë inte ongongampa, ante yewæmōmōnī adinque ēñencæminimpa.

²Mänōmai inongā inte tōmengā wīi waocä nänō mænongaincōnē cæcampa. Wæætē Wængonguī, Owocæboimpa, ante tæiyæ waemō nänō mænongaincōnē Itota iñōmō mönō beyæ ante, Wængonguī quī, ante nē Godongā Ñænængā pōnī inte cæcampa.

³Inguipoga quëwēnāni guiquënë adocanque ingante, Wængonguī quī, ante bitō nē godōmi ñænæmi pōnī bacæbiimpa, änāni badinque tōmengā nē tã nē tã cædinque mäincōo cōwē godonguēnengā ingampa. Iinque mäningā Itota guiquënë adobaī nē Godongā Ñænængā pōnī inongā inte adobaī godonguēnengā ingampa. ⁴Edæ, Iincōoque godoncæminimpa, ante Mōitee wodi wæx angā ēñente cædinque inguipoga nē godōnāni guiquënë do eyepæ pōnī godōnāni inānīpa. Iinque tōmēnāni nāni godō bai Itota iñōmō ædō cæte godonguēnengā inguingää. Inguipogaque quëwengā inte bai tōmengā iñōmō edæ Wængonguī ingante nē godongā ināmai incædongäimpa.

⁵Tōmēnāni guiquënë, Wængonguī öönædē nänō owocō cōwē ongō bai inguipoga adobaī mænonte mänincō öwocodenganque bai iñonte acäimpa, ante adobaī pōnī mænongadānīpa.

Mänōmai mænōninque tōmēnāni mänincōnenque, Wængonguī quī, ante nē godōnāni inte cædānīpa. Iinque Wængonguī, Adobaī pōnī mænōincō ongongäimpa, ante cædinque Mōitee wodi nē mænonguingā ingante doyedē angacäimpa. “Mōitee ēñēmi. Bitō, Æbānō mænonguīi, ante, Æbānō badonguīi, ante botō onquiyabo iñōmō bee tente odōmōmo adinque badoncæbiimpa. Bitō cōwā adinque botō odōmōnō bai iincō adobaī mænōninque iincōnē ongoncōo tōmancōo adobaī pōnī badoncæbiimpa,” angacäimpa. ⁶Wængonguī, Botō Mōitee tōnō wæx äninque, Iīmai cædāni, ämo ate Ao ämīni iinque mönō godongämæ waa cæte quëwengäimpa, ante wēēñēdē nänō angainō wædænque waa ingatimpa. Ñōwo guiquënë tōmengā, Itota ængā beyænque quëwēmini inte Ao ämīni iinque mīnitō botō tōnō godongämæ waa cæte quëwencæminimpa, ante nänō änō iñōmō godōmenque waa pōnī impa. Edæ Wængonguī nänō änō iinque bacäimpa, ante Itota incæ nō cægacäimpa. Ayæ adobaī mäninō nē godōnāni nāni cædō guiquënë wædænque waa iñonte Itota nänō nō cædō guiquënë godōmenque waa pōnī impa.

⁷Mänīne edæ, Mönō godongämæ waa cæte quëwengäimpa, ante Wængonguī wēēñēdē nänō angaine iñōmō mönō quëwenguinō ante eyepæ ī bai Wængonguī ñōwo wade ante änāmai incædongäimpa. ⁸Incæte waodāni wentamō mongænāni adinque Wængonguī doyedē apænedinque, “Botō pōnō cæbo ate mīnitō Ao ämīni iinque mönō godongämæ waa cæte quëwengäimpa, Ante botō nē Awënë inōmo inte idægoidi inānite oodaaidi inānite iincayæ ate mīine ante mä pōnī apænecæboimpa.

⁹Mämæidi doyedē Equitobæ quëwēñōnānite botō tōō æmænte ænte poncæte ante cædinque, tōmēnāni inānite, Mönō godongämæ waa cæcäimpa, äñōmote

tömənäni wæætē pango cæte
gogadānimpa.

Pango cæte godāni ate botō wæætē
dadi ēmæmonte tömənāni inānite
adāmaī ingaboimpa.

Mänōmaī beyæ botō wēēnēñedē
botō angainō bai
ñōwo wæætē adobainō ante ānāmaī
incæboimpa, ante botō nē
Awēnemo inōmo inte āmopa.

¹⁰ Māniñedē ate edæ idægoidi inānite
botō,

Īmaī pōnō cæbo ate mīnitō Ao
āmīni ininque
mōnō godongāmæ waa cæte
quēwengæimpa, āninque edæ
īmaī cæcæboimpa.

Īmaī cæedāni, ante botō wææ ānō
ante godō apænebo ēñēninque
mānīne ante mīmōnē yewæmonte
bai entawēninque
tömənāni nē wede pōnēnāni
incædānimpa.

Tömēmo tömənāni Wængonguīmo
īñōmote tömənāni wæætē botō
quināni incædānimpa.

¹¹ Māniñedē botō angaiñedē ba ate
edæ waocā tömengā guidengā
ingante
ayæ wacā ingante odōmonte
apænedinque,
Bitō Wængonguī ingante ate bai
pōnencæbiimpa, ante quinante
anguingāā.

Īñæmpa māniñedē ate guiyanga
pōni inongā incæ ñænængā pōni
inongā incæ
tömənāni tömānāni botō imote do
adinque pōnencædānimpa.

¹² Edæ tömənāni ēñēnāmaī nāni cædō
ante botō pānāmaī inte waadete
godō ñimpo cæcæboimpa.

Ayæ tömənāni wēnæ wēnæ nāni
cægāinō ante adāmaī inte bai
botō pōnēnāmaī incæboimpa,”
ante Wængonguī apænegacāimpa.

¹³ Āninque ñōwo, Āmo beyænque
quēwēmīni inte mīnitō Ao āmīni
ininque mōnō godongāmæ waa cæte
quēwengæimpa, ante mā pōni āninque

Wængonguī wēēnēñedē, Īmaī cæedāni,
ante nānō wææ angāine ante, Woīne
inte eyepæ ināmaī ingāine ēnepa, ante
bai cæcampa. Woīne īñōmō oo dæ
baquīne ēnepa.

Wængonguī Tæiyæ Waēmō oncō bai æmontaicō impa

9 ¹ Wængonguī wēēnēñedē dodāni
inānite, Botō pōnō cæbo ate
mīnitō Ao āmīni ininque mōnō
godongāmæ waa cæte quēwengæimpa,
angacāimpa. Īninque tömengā nānō
wææ angāinō bai cædinque tömənāni,
Wængonguī ingampa, ante tömengā
beyæ cæquēnēnāni ingadānimpa.
Ayæ inguipoga tömengā owoquincō
tæiyæ waēmō oncō mænōninque
tömengā weca pōninque cæquēnēnāni
ingadānimpa. ² Angā ēñēninque
dodāni, Wængonguī nānō owoquincō,
ante æmontaicō badōninque wecoo
odemontai wodōnedinque mencōnea
badongadānimpa. Yabæcōnē, Tæiyæ
Waēmō Oncō impa, ante nāni ancōnē
īñōmō māniñōmō gongapæncade
doyæncade tæiyæ ti wodōnoqui
encadocade ongongatimpa. Ayæ
awæmpaa badōninque tömənāni,
Wængonguī beyæ tæiyæ waēmō pāo
ōñongæimpa, ante cædinque mānimppaa
pāo ñō cædāni ōñongatimpa.

³ Wecoo wacoo nāni guimongademō
wodōiñōmō guimongacō īñōmō
Tæiyæ Waēmōncō Pōni nāni angāincō
ingatimpa. ⁴ Mānincōnē oguī wacæimpa,
ante cædinque, Oguī waqui iya
tangæimpa, ante awæmpa oodo nāni
pōnō tee bæimpa badonte cō cædāni
ongongatimpa. Ayæ, Mōnō godongāmæ
waa cæcæimpa, ante wææ āninque
Wængonguī nānō yewæmongainca Tæiyæ
Waēmōncōnē Pōni ongongæimpa, ante
cædinque awæmpa badōninque oodo
yabæpa tee baadinque cæncadempa
adobai tee baate nāni cōnōimpa
ongongatimpa. Ayæ oodo āninque aca
podonte wamōncade bai bædinque
tömənāni ōnōmæca nāni cængaimō
Mānāā nāni angāimō æninque oodo nāni

bædincadedē da wēninque mǎnincade wæætē oodo ēmompaa cæncadē inō da wente cō cæte mangadānimpa. Ayæ adobaī Aadōō wodi nānō ongonto tā bocagainto æninque ado oodo ēmompaa cæncadē inō da wente nō cædāni oñongatimpa. Ayæ Wængonguī dicaboga nānō, Īimai cædāni, ante yewæmongaine adoyōmō ongongæimpa, ante cædinque mǎnınca æninque ado oodo ēmompaa cæncadē inō da wēninque cō cædāni ongongatimpa.

⁵Mānimpaa yædopaa waomīni mīni wēnæ wēnæ cædō beyæ wepæ godonte impa, ante Wængonguī, Botō pōnō waadeimpa impapa, angacāimpa. Ayæ Wængonguī nē nāō ēmongā weca nē owoda inōmō adobaī nāō baī ēmōna inōnate tōmēna nāna ēmōnō baī dodāni adobaī badonte oodo ēmompaa æmatæ æmatæ tæi goncædāni ongongatimpa. Ayæ tōmēna oōmā tiyæmāa pōmæna gānē inōmō Wængonguī, Botō pōnō waadeimpa, ante nānō angaimpa oñongatimpa. Mānimpacoo æbānō impaa, ante mǎninque nōwo yewæmōmōnipa.

⁶Tōmancoo mǎnōmai cōō cædāni ongōñonte, Wængonguī quī, ante nē godōnānique ĩimō inō ĩimō inō yabæcōnē pō guiidique, Wængonguī ingampa, ante cægadānimpa.

⁷Guiimongacōnē guiquēnē nē godongā nǎenængā inōmō wadepo inō adopoque wadepo inō adopoque pō guiidique tōmengā adocanque guiidongāimpa. Incæte tōmengā nē godongā nǎenængā pōnī inongā incæ wepæ nǎænāmai inte ædō cæte guiquingā. Edæ wepæ cōwē ænte guiidique tōmengā nāmā beyæ godō pipo pipo cædinque, Wadāni ēñēnāmai inte nāni wēnæ wēnæ cægāinō incæ nā mēnongacæimpa, ante tōmēnāni beyæ adobaī godō pipo pipo cædongāimpa. ⁸Mānincō æmōntaicō ayæ ongōñedē Tæiyæ Waēmoncōnē Pōnī wīi ōnonque guigadānimpa. Wængonguī nānō owodō æidō māniñedē adobaī wīi edonque ingatimpa, ante odōmoncæte ante Wængonguī Tæiyæ Waēmō Ōnōwoca angā guidāmai ingadānimpa.

⁹Mānōmainō ante odōmōninque tōmengā mōnō nōwomō imonte wæætē, Īimai ante ēñencæminimpa, ante cægacāimpa. Waocā, Wentamō mongænte awædō, ante nē wædongā inte waēmō inōmō pōninque, Wængonguī quī, ante baō iya tanguī tōnō bequī cænguī godongampa. Mānōmai ancaa godongā incæte tōmengā mīmō nāmā nānō apænte entawēnō nā mēnongadāmai inte wentamō ayæ mongænte entawēnongāimpa.

¹⁰Mānōmai cænguīnque bequīnque ante wææ āninque, Æbānō cæte godonguī, ante ayæ, Æpænenque æbānō cæte mēnongaquīi, ante dodāni mǎnincooque ante nāni wææ angāinō ante ēñente cægadānimpa. Īinque, Waguiipo ĩinque bayonte ōnōwoca ædæmō mēnongate quēwengæimpa, ante mīnguipo ĩinque bagancaque tōmēnāni mǎnincooque ante cædōnānimpa.

¹¹Wapāmo mīni waa quēwenguīnque pōmāmo, ante badoncæte ante mōnō Codito inōmō, Wængonguī quī, ante nē Godongā Nǎenængā pōnī inongā inte do pongacāimpa. Pōninque tōmengā wadāni ōnompoca nāni mǎnongaincōnē guidāmai inte Wængonguī nānō badongainguipoga cædāmai ingacāimpa. Wæætē adodō go æidique tōmengā ōnædē Wængonguī nānō owocōnē nǎenæncōnē guiidique nāwā owocōnē cægacāimpa. ¹²Caboda wepæ nǎænte guidāmai inte wagada wē wepæ nǎænte guidāmai inte mōnō Codito inōmō edæ nāmā wepæ godōninque ōnædē Tæiyæ Waēmoncōnē Pōnī æmæwo guigacāimpa. Īinque tōmengā ængā beyænque mōnō æmæwo pōnī abæ tawænte baī cōwē quēwēmōmpa.

¹³Nōmæi incæ gampodique, do wæningā baō incæ gampodique waocā nāate baī wædongā inte edæ Wængonguī weca ædō cæte ponguingā. Wæætē, Tōmengā waīnacā bate poncæcāimpa, ante cædinque, Wængonguī quī, ante nē godōnāni inōmō caboda wepæ tōnō wagada onguīñængā wepæ æninque nē

nāadingā baonga pipo pipo cædānīpa. Ayæ wagada baquecā ingante wænonte nē tānīnque gōnaique adobai ænīnque tōmengā baonga pipo pipo cædinque, Bitō nē nāadīmi inte waiñabi babīpa, ante cægadānīmpa.

¹⁴Mōnō Codito guiqūēnē Tæiyæ Waēmō īnongā inte nē cōwē Quēwengā Ōnōwoca tōnō guēa cædinque Wængonguī ingante, Bitō quīmo īmopa, ante nāmā wepæ godongacāīmpa. Tōmengā wepæ īñōmō wīī cæningā wepæ bai inte godōmenque eyepæ pōnī wepæ īmæmpa. Īnīnque mōnō wænguīnque wēnæ wēnæ cæyōmonte tōmengā, Mīnitō mīmō entawēmīni inte nā mēnongate entawente nāmā apænte pōnente quēwencæmīnīmpa, ante nāmā wepæ do godongacāīmpa. Ayæ mōnō wēnæ wēnæ cægāinō ante wadæ cædinque godōmenque pōnō cæcā ate mōnō Wængonguī nē Quēwengā ingante nē cæmō badīnque cæmōmpa.

¹⁵Wængonguī mīīne ante apænedīnque, Mōnō godongāmæ waa cæte quēwengæīmpa, āñongante mōnō waocabo wæætē ēñēnāmāi inte wēnæ wēnæ cæmō adīnque Codito īñōmō mōnō wēnæ wēnæ cægāinō beyæ ante wæætē wængā beyænque mōnō abæ tawænte bai quēwēmōmpa. Nōwo īñōmō Wængonguī mīīne ante apænedīnque, Botō pōnō cæbo ate mīnitō Ao āmīni īnīnque mīni ænguīncoo æmæwo ænīnque mīnitō cōwē mante quēwencæmīnīmpa, ante aa pecā pongamōnīmpa. Īnīnque mōnō Codito wæætē, Wængonguī nānō angāincoo æncæmīnīmpa, ante cædinque īnīnque cæcā ate mōnō nē pōnīmō inte do ænte quēwēmōmpa.

¹⁶Waocā, Nāñe wæmo adīnque botō māincoo īnī īñānīnque æncædānīmpa, ante ēmōwo ēmōwo yewæmongā adīnque wadāni wæætē, Nāwangā æmæwo wængāīmpa, ante ēñente ate, Nē wængāingā nānō ante yewæmongāinō bai bacāīmpa, ante īnīnque cædānīpa. ¹⁷Īñæmpa, Īñāni quī bacāīmpa, ante yewæmongā incæte nē

yewæmōningā mīingā quēwēñongante tōmengā māincoo ædō cæte tōmēnāni quī baquīī. Wæætē tōmengā æmæwo wængā ate māñīñedē ate tōmengā nānō yewæmongāi bai īnīnque cædānīpa.

¹⁸Mānōmāi beyæ wēēñēnedē Wængonguī, Mōnō godongāmæ waa cæcæīmpa, ante yewæmongā ate dodāni cæningā wænonte ate wepæ gowete ate godongāmæ Ao ānīnque īnīnque cægadānīmpa. ¹⁹Wængonguī, Īīmaī cæedāni, nānō wææ angāinō tōmanta adīnque Mōitee wodi īñōmō tōmānāni īñānīte apæñecā ēñēnāni ate wepæ gowete ate cægacāīmpa. Wagada wēnāni wepæ tōnō caboda wepæ ænīnque æpæ tōnō ænte wempo cædēnīnque īitopowæ nāni āwæ yæpængō ænīnque obega ocaguī opatawæmæ nāni guīpæninguī ante pæ dacadīnque wepæ nāni wempo cædēnīmānē bee podonte Mōitee īñōmō, Mānīnta adīnque ēñēngæīmpa, ante cædinque mānīntaa wepæ pipo pipo cægacāīmpa. Ayæ nē ēñēñāni tōmānāni baonga wepæ pipo pipo cædinque tōmengā Īīmaī angacāīmpa. ²⁰“Wængonguī, Botō pōnō āmo ēñēnīnque mīnitō Ao ante ēñente cæmīni īnīnque mōnō godongāmæ waa cæcæīmpa, ante nānō wææ angāinō beyænque īī wepæ īmpa. Īnīnque īī wepæ ēmontaa adīnque mōnō Ao ante mānīne ante ēñente cæcæīmpa,” ante Mōitee wodi apænegacāīmpa. ²¹Ayæ æmontaīconga wepæ pipo pipo cædinque tōmengā mānīncōnē Wængonguī beyæ nāni cæincooga wepæ pipo pipo cægacāīmpa. ²²Ayæ wodo tōmancooga ante Wængonguī, Wepæ tōnō nā mēnongacæīmpa, ānīnque wææ angā cægadānīmpa. Īñæmpa wepæ gowedāmāi īñonte mōnō wēnæ wēnæ cæmō adīnque Wængonguī nē panguēnengā inte ædō cæte pōnō ata cæpoquīngāā.

**Codito wepæ beyænque mōnō
mīmō mēnongacæīmpa**

²³Ōñædē ongoncoo bai inguīpoga nāni adobai badongāincoo incæ

cæningā wænonde ate wepæ tönö ñā mēnongaquēnēnāni ingadānimpā. Wæætē nāwā öönädē Wængongui weca gote mönō ongonguinque mönō adocanque nē waēmō pōnī inongā wepæ beyænque ñā mēnongaquēnēmō imompā. ²⁴Edæ öönädē Wængongui nānō owocōnē bai ante waodāni önompoca nāni tæiyæ waēmō pōni badongaincōnē mönō Codito guidāmai ingacāimpā. Wæætē öönädē incæ æidinque tōmengā mönō beyæ ante Wængongui weca guiddinque a ongongampā.

²⁵Wængongui quī, ante inguipoga nē godongā ñænængā pōni inongā guiquēnē wīī nāmā wepæ ænte pōninque cæningā wepæ incæ ænte pōninque wadepo iñō adopoque wadepo iñō adopoque Tæiyæ Waëmoncōnē Pōni guicampā. Mönō Codito guiquēnē inguipoga nē quēwengā bai wīī adobai inongā inte wīī wæætē wæætē godoncæte ante öönädē æi guigacāimpā. Wæætē öönädē adopoque æi guiddinque tōmengā nāmā wepæ adopoque godongacāimpā. ²⁶Edæ inguipoga nē quēwēnāni nāni cæi bai cæcā bai tōmengā Wængongui inguipoga nānō badōñedē mā caate wædinque wantæ wantæ iñō cædinque ñōwo ganca tæmpo caate wæcædongāimpā. Wæætē mönō waocabo tōmāmō pedænguipoga mönō quēwēnō wodo iinque bayonte tōmengā ñōwo pōni adopoque pōni pōninque wēnæ wēnæ mönō cædō ante æmæwo wido cæcæte ante nāmā wepæ godongacāimpā.

²⁷Mönō waocabo guiquēnē nē wænguimō inōmo inte adopoque wænte ate Wængongui weca pō gongæñōmonte tōmengā apænte ancæcāimpā. ²⁸Mönō waocabo nanguī imō iñōmonte mönō Codito iñōmō wēnæ wēnæ mönō cædō ante mongæninque adopoque nāmā godōninque wængacāimpā. Ayæ wæætē pōninque tōmengā wīī mönō wēnæ wēnæ cædō mongæncæte ante poncæcāimpā. Wæætē tōmengā nānō ponguinō ante nē wānō cōmō iñōmonte tōmengā, Quēwencæminimpā, ante mönō imonte æncæte ante poncæcāimpā.

10 ¹Iincayæ ate nē Ponguingā iñōmō, Wængongui quī, ante nāmā wepæ eyepæ godoncæcāimpā, ante odōmoncæte ante cædinque Wængongui, Iimai cæte cæningā wepæ pōnōedāni, ante do wææ angacāimpā. Incæte māniī wepæ Wængongui nānō wææ angaimæ iñōmō wīī eyepæ godongui ænguī impā. Iinque mānimæ tōmengā nānō wææ angaimæ beyænque waocā ædō cæte ædæmō ēñente picængā bai baquingāā. Iñæmpā idægoidi iñōmō wadepo iñō wadepo iñō wepæ anca godōninque Wængongui weca pō ædæ wææninque, Bitō Tæiyæ Waëmō imidō anguēnē, ante apænecæte ante pōnāni incæte tōmēnāni tōmengā nānō wææ angainō beyænque picænāni bai dicæ badāniyaa. ²Tōmengā nānō wææ angainō eyepæ ī bai tōmēnāni adopoque godōninque idæwaa godoncædōnānimpā. Edæ, Wængongui ingampā, ante nē cædāni iñōmō māninque godōninque ædæmō ñā mēnongate bacædōnānimpā. Ayæ iincayæ ate tōmēnāni, Wentamō entawente wænguī wæ, ante nāmā apænte wædāmai incædōnānimpā.

³Edæ wīī mānōmai impā. Wæætē, Botō wēnæ wēnæ cæte awædō, ante wæætē wæætē nāni pōnente wæquinque tōmēnāni wadepo iñō wadepo iñō godōnōnānimpā. ⁴Edæ, Mōni wēnæ wēnæ cægāinō ante mēnongacæimpā, ante godōñōnāni wagada onguīñæ wepæ tōnō caboda wepæ eyepæ imæmpā diyæ mēnongaquīī.

⁵Cæningā wepæ wīī eyepæ impā, ante wædinque Codito inguipoga pōninque iimai ante apænecacāimpā.

“Wængongui ēñēmi. Cæningā baō nāni wænonde pōnōnō tōnō cænguī bequī nāni, Wængongui quī, ante pōnōnō adinque bitō edæ wīī æinēmi ingabiimpā.

Wæætē botō Waobo baquinque bitō botō baō ante badongabiimpā.

⁶Waodāni, Wængongui quī, ante iya tāmōni ate Wængongui waa acæcāimpā, ante tāñōnāni bitō wīī tobi ingabiimpā. Tōmēnāni,

Wënæ wënæ möni cædō
ante Wængonguī pōnō wido
cæcæcäimpa, ante pōnōñnānite
bitō Baa angabiimpa.

⁷ Ante adinque botō, ‘Wængonguī
ēñēmi. Dodāni botō ïmotedō
ante yewæmōninque, Tömengä
ingui-poga pōninque ïimai
cæcæcäimpa,
ante nāni yewæmongainō bai
cædinque botō bitō änō ēñente
cæcæte ante pōninque a ongōmoī
ae,’ antabopa,”

⁸ Möitee wodi guiquēnē, Cænīnāni
inānite wænōninque mīnitō, Wængonguī
quī, ante pædæ godōninque cænguī
tōnō bequī godoncæmīnimpa, ante
wææ angacäimpa. Incæte mönō Codito
Mæmpocä ingante täno apænēdinque,
Waodāni cæningä nāni wænonte pōnōnō
tōnō cænguī bequī nāni, Wængonguī
quī, ante pōnōnō adinque bitō wīī
æñēmi ingabiimpa. Wængonguī quī,
ante iya tāmōni ate Wængonguī waa
acæcäimpa, ante ayæ, Wënæ wënæ
möni cædō ante Wængonguī pōnō wido
cæcæcäimpa, ante pōnō täñōnāni bitō
Baa ante wīī tobi ingabiimpa, ante
Codito apænēgacäimpa. ⁹ Ayæ, “Bitō
änō cæcæte ante pōninque a ongōmoī
ae,” angacäimpa. Äninque tömengä, ïine
botō angainō ïñōmō ædæmō ēñenguīne
bate ongongæimpa, ante cædinque
Möitee wodi wëenēñedē nānō angaine
ante da godonte bai cægacäimpa. ¹⁰ Ayæ
Wængonguī nānō änō ante nē ēñente
cæcä inte Itota Codito, Wængonguī
quī, ante baonga ēñadinque adopoque
wænīnque nāmā wepæ eyepæ godongä
beyænque mönō wæætē Wængonguī
ayongä täiyæ waëmō ewocamō bate
quëwëmompā.

¹¹ Wængonguī quī, ante nē godōnāni
guiquēnē tömānāni ïimō ïñō ïimō
ïñō adiyæ gongænte Wængonguī beyæ
ante cædānipā. Mänōmai wæætē
wæætē godōninque ado ado godōnāni
beyænque tömēnāni wënæ wënæ
nāni cædō ante ædō cæte wido cæte
baquīī. ¹² Mäningä mönō beyæ nē

nō Godongaingä guiquēnē adopoque
godōninque ïinque baganca eyepæ pōni
godōninque Wængonguī tömēmängä inō
æi tä contate ongongampa. ¹³ Mänōmai
ongōninque, Botō ïmote piinte cædāni
inānite Wængonguī æyedēnō botō
nempo pōnongä æninque botō täi
ëmōmō inte nē ämo baquīmoo, ante
Codito ñowo ganca wänō congampa.
¹⁴ Edæ tömengä pōnō badongä ate
mönō täiyæ waëmō ewocate quëwëmō
bayōmonte tömengä adoque pōni
nānō godongainō beyænque, Ædæmō
picæmīni bacæmīnimpa, ante do
badongacäimpa. ¹⁵ Mänīnō ante
Wængonguī Täiyæ Waëmō Önōwoca
mönō ïmonte adobai apænecampa.
Tömengä täno apænēgacäimpa.

¹⁶ “Mönō Awënē ïimai angacäimpa.

Mäniñedē ate ïincayæ ate,
botō pōnō cæbo ate Ao änāni
ïinque mönō godongämæ waa
cæte quëwengæimpa,
ante ïinque cæcæte ante ïimai
cæcæboimpa, angacäimpa.
Botō pōnō apænebo ēñēninque
tömēnāni, ïimai cæedāni, ante
botō wææ angainō incæ mimōnē
entawencædānimpa.
Botō pōnō apænebo ēñēninque
mänīne ante ocai encate
ēñencædānimpa.

¹⁷ Ayæ, Wënæ wënæ nāni cædō ante
ñimpo cædinque botō pōnēnāmai
incæboimpa. Eñēnāmai nāni
cædō ante botō wæætē wæætē
änāmai incæboimpa,” angampa.

¹⁸ ïinque tömengä pōnō ñimpo cæcä
ate mönō edæ, Wënæ wënæ mönō
cædō beyæ pänāmai incæcäimpa, ante
quīnante godōmenque godonguīī.
Ïñæmpa tömengä dobæ ñimpo
cægacäimpa.

**Mönō Wængonguī weca
pongæimpa, ante**

¹⁹ Ïñānāni ēñēdāni. Täiyæ Waëmō
Pōni Oncōnē pō guiite bai mönō Itota
wepæ beyænque guīñēnāmai inte
Wængonguī weca do guiquēnēmō

imompa. ²⁰Weocoo mānincōnē nāni wææ cægaincoo wægo tē bai Itota baō adobaī wangō cote ingatimpa. Mānōmai beyæ odemō mīinēmō wi ænete bai ī adinque mōnō quēwenguinēmō guidinque Wængonguī weca edæ do guimompa. ²¹Wængonguī nānō godongāmæ owocabo iñōmonte, Wængonguī quī, ante nē Godongā Ñænængā pōni inongā iñōmō adocā Itota iñōmō mōnō imonte nē aacā inongā ingampa. ²²Mānōmai beyæ mōnō Wængonguī weca pō guicæimpa. Wēēñēfēdē wentamō mōnō entawēnō ante Itota nāmā wepæ inte ñā mēnongacā ate mōnō nāmā apænte nō cæinēmō inte guicæimpa. Ayæ mōnō baō waēmōmæ äate bai ēmōmō ininque mōnō, Wængonguī tōmengā nānō änō bai cōwē ædæmō cæcæcāimpa, ante wede pōnēninque mōnō guīñēnāmai inte tōmengā weca do guicæimpa. ²³Botō cōwē pōnō cæcæboimpa, ante nē angaingā iñōmō nē ædæmō cæcā ingampa, ante adinque mōnō, Tōmengā nānō änō bai cæcā beyænque watapæ bacæimpa, ante mōnō pōnēnō ante cōwē wido cædāmai inte mōnō pōnengæimpa. ²⁴Ayæ, Mōnō pōnencabo tōmāmō waadete pōnēninque waa cæte quēwengæimpa, ante cæcæte ante pōnente adinque mōnō wacā ingā wacā ingā iīmai godō cæcæimpa. ²⁵Pancadāniya Wængonguī ingante godongāmæ apænecæte ante pōnāmai inte wadæ godāni incæte tōmēnāni nāni cæi bai mōnō adobaī cædāmai ingæimpa. Wæætē, Codito nānō ponguīōnæ oo pōni impa, ate pōnente wædinque mōnō pōnencabo iñōmonte mōnō wacā ingā wacā ingā edæ waadete apænedinque, Wængonguī gāmænō pōninque watapæ quēwēmīni incæmīnimpā, ante apænecæimpa.

²⁶Wængonguī nō nānō änō ante do ēñēnimō inte mōnō, Wīi ēñēinēwædō, āninque godōmenque wēnæ wēnæ cæmō ininque edæ wēnæ wēnæ mōnō cædō ante mēnongaquīmæ ante edæ wepæ dæ ā bai babaimpa. ²⁷Wæætē

mānōmai ancaā ēñēnāmai cæmō ininque mōnō Wængonguī nānō apænte ante panguimāmoque ante guīñente wæcōmaimompa. Edæ mōnō Baa ante godōmenque wēnæ wēnæ cæmō ininque Wængonguī ingante nē pīināni nāni gonte wænguimāmoque ante, Mōnō adobaī gonte wæncæ wæ, ante guīñente wæcōmaimompa. ²⁸Mōitee wodi nānō wææ angainō ante, Wīi ēñēinēwædō, ante adocanque nē angā iñongante Waoda mēnaa ina incæ waodāni mengāa go adocanque ināni incæ, Mānōmainō ante apænecā ēñēntamōnīpa, ante apænedāni ēñēninque nē āningā ingante waadedāmai inte godō wænongadānimpā.

²⁹Ininque adocanque Wængonguī Wengā ingante pīnā gāwate bai cædinque Baa angā adinque tōmengā ingante Wængonguī ædō cæte pānāmai inguingāā. Wængonguī, Botō pōnō æmo ate mīnitō Ao āmīni ininque mōnō godongāmæ waa cæte quēwengæimpa, ante nānō angainō ininque bacæimpa, ante cædinque Itota nāmā wepæ inte mōnō imonte ñā mēnongacā beyæ tōmengā ayongā tæiyæ waēmō ēwocamō bagamōimpa. Incæte adocanque Itota nānō nē ñā mēnongadingā inongā inte, Itota wepæ wīi waēmō ī awædō, ante pīingā adinque Wængonguī ædō cæte apænte ante pānāmai inguingāā. Ayæ Wængonguī Ōnōwoca nē waadete pōnō cædongā iñongante adocanque badete tocā adinque Wængonguī tōmengā ingante ædō cæte pānāmai inguingāā. Edæ Mōitee wodi nānō wææ angainō ante Baa ānāni inānite wædænque pāninque Wængonguī iīnāni inānite godōmenque nanguī pōni pancæcāimpa, ante pōnēmīniyaa.

³⁰Wængonguī, “Botō tōmēmo nē panguimo imopa. Wīwa nāni cædinō beyæ eyepæ pōni godō pāmo wæcædānimpā,” angacāimpa. Ayæ, “Botō nē Awēnē inōmo inte botō quīnāni inānite apænte ancæboimpa,” angacāimpa. Mōnō iñōmō, Mānōmainō ante nē apænte pancæ angaingā ingante

æbänö ingää, ante do eñemompa. ³¹Edæ Wængongui nè Quëwengä inongä inte edæ ængui badinque bæi ongonte pangä wæcæ wæ, ante mönö nangui guiñëñate wæcæimpa.

³²Wëenëñedë Wængongui apænecä eñëmini inte minitö tæcæ ñäö bai entawëmini ate wadäni pö piinte guëadö guëa cæyönäni minitö mini caate wæquinque tæi ongöningue godömenque cæminitapa. Mänömai mini cædinö ante ñöwo pönëedäni.

³³Pancayedëña iñömö nè piinte cædäni tömänäni ayönäni minitö iminite badete todinque pänänitapa. Pancayedëña guiquënë minitö tönïñadäni adobai caate wæyönänite minitö, Adocabomöni imönipa, ante bai cædinque nè caate wædäni tönö godongämæ ongöminitapa.

³⁴Wadäni inänite tee mönedäni adinque minitö tömëñäni tee mönete näni wædö ante pönëningue tömëñäni tönö godongämæ wæminitapa. Ayæ, Mönö mäincoo öönædë godömenque waa pönï ongoncoo inte cöwë ongongæimpa, ante eñëmini iñöminite wadäni ingui-poga minitö ëadincoo ö äñäni adinque minitö wædämai inte watapæ tominitapa. ³⁵Ïnque, Mönö wede pönëno beyænque eyepæ pönï ængui-mö imompa, ante eñëningue mäninö mini wede pönëno ante wido cædämai ïedäni.

³⁶Ayæ, Wængongui nänö änö ante eñente cæmöni ate tömengä, Pönömo æncæminimpa, ante nänö angaincoo ante cöwë pönongä æncæmönimpa, ante cædinque minitö wæntædämai inte ee cæquënëmini iminipa. ³⁷Edæ Wængongui beyæ ante do yewæmongatimpa.

“Wantæ wantæ ate nè Ponguingä mönö änogä iñömö do poncæcäimpa.

Edæ tömengä nänö angaiönæ iinque bayonte

tömengä eyepæ pönï poncæcäimpa.

³⁸Në nö cæte quëwënogä incæ tömengä nänö wede pönëno beyænque quëwëncæcäimpa.

Adocä wæætë guiñente wædinque wodii winongä adinque,

botö tömengä ingante adinque wii tobaïmopa,” ante Wængongui beyæ yewæmongatimpa.

³⁹Mönö guiquënë tömëñäni näni cæi bai cædämai iñömö inte wii guiñente wædömo inte wodii winönämai imompa. Edæ wodii winonte bai mönö æmæwo ëwente baquënëmo imompa. Wæætë edæ tömengä ængä beyænque mönö quëwëningue tömengä ingante wede pönëmo imompa.

Mönö wede pönëno ante

11 ¹Wængongui pönö cæcä ate watapæ bacæimpa, ante mönö pönëno ante mönö, Wængongui ayæ cædämai ingä incæte cöwë cæquingä ingampa, ante wede pönëmompa. Awinca adämai ëmömö incæ mönö mímöno wede pönëningue awinca do ate ëmonte bai ëwocamö inte mönö, Näwangä bacæimpa, ante do eñëmö imompa. ²Dodäni wede pönëñäni iñönänite Wængongui, Mini wede pönëno beyænque botö minitö iminite waa abopa, ante apænegacäimpa.

³Wængongui ingui-pö tönö iimönæ tömäo badoncæte ante cæyongä quiëmë impa ænte badonguingä. Ïnämpa dæ angatimpa. Ïnque mönö nè acoo dæ äñonte mänincoo äñämai inte tömengä wæætë mä pönëningue angä beyænque mönö nè acoo do bagatimpa. Mänömai ingatimpa, ante wede pönëningue mönö Ao ämopma.

Dodäni näni wede pönëngainö

Abedo wodi

⁴Abedo wodi iñömö Wængongui nänö angainö ante wede pönëningue, Wængongui qui, ante nö cæte godöningue Cäinö wodi wæætë önömonque nänö godönö bai wii godongacäimpa. Tömengä mänömai wede pönente cæcä adinque Wængongui, Abedo bitö nö cæte pönömi æmopa, ante apænegacäimpa. Ïnque do wænte gogaingä inongä incæte Abedo wodi, Botö wede pönente cægai bai adobai

wede pönente caedäni, ante ñowo ganca ayä apänete bai apänecampa.

Ēnoco wodi

⁵Ēnoco wodi guiquënë nē wede pönengä iñongante Wængongui, Ēnoco ēñēmi. Bitō botō nē waa adōmi inte bitō wänguēnēmāmo ante wädāmai inte pōe, āninqe inque iñongante ō ænte wo ææntodongä æigacäimpa. Æite gocä ate wadäni ancaa diqui diqui mininqe Wængongui nānō nē wo æntodongä ingante adāmai ingadānimpā. Edæ tömengä ingante Wængongui ayä ææntodönāmai iñongante wadäni, Ēnoco wede pönengä ingante Wængongui waa acampa, ante do ēñēnōnānimpā. ⁶Edæ Wængongui weca poncæte ante cædinque waocä, Wængongui nē Quëwengä ingampa, ante wede pönenguënegä ingampa. Ayä adobai, Wængongui ingante nē diqui diqui mimō iñōmonte tömengä, Pōe, āninqe pönō waa cæcampa, ante wede pönēninqe nē poncæ cæcä pongampa. Mänōmainō ante nē wede pönēnāninqe Wængongui weca pönānīpā. Māninō ante nē wede pönēnāmai ingä guiquënë tömengä ingante Wængongui ædō cæte waa aquingä. Edæ waa adāmai ingampa.

Docä Nōwee wodi

⁷Nōwee wodi Docä nāni ānongä guiquënë, Æbānō baquīī, ante adāmai iñongante Wængongui, Nōwee ēñēmi. Bitō adāmai imāmo oo pongäimpa cæbii. Angä ēñēnte guīñente wædinque nē wede pönengä inte tömengä nāni wencabo nāni guiite quëwenguinqe wipo ñænængade impo incæ ñænæñ oncō bai badongä ate guiite quëwengadānimpā. Nē wede pönēnāninqe nāni nō entawēñō bai adobai nō nānō entawenguinqe Nōwee wodi wede pönente cægacäimpa. Īninqe tömengä adocanque wede pönēninqe mānōmai cædingä iñongante wadäni guiquënë nāni apēnte wänguinqe Baa angadānimpā.

Abadäo wodi

⁸Abadäo wodi guiquënë tömengä wede pönengä iñongante Wængongui, Abadäo ēñēmi. Botō pönōmo bitō ænguimæ ante botō odömōmo goe. Angä ēñēninqe, Æbæmē impā, ante adāmai inongä inte Abadäo wede pönēninqe ēñēnte cædinque do gogacäimpa. ⁹Mänōmai wede pönēninqe wadäni nēmæ gote wacä inongä inte wantæ iñō quëwengä bai inte æmontaicōnē owogacäimpa. Ayä Wængongui nānō angaimæ nē ænguina inōna inte tömengä wengä Itæca wodi adobai tömengä wengä Aacobo wodi adobai wantæ iñō quëwente bai æmontaicōnenque owote quëwengadäimpā. ¹⁰Wængongui doyedē pōni, Waodäni nāni öönædē quëwenguīñōmō ante botō iīmai badoncæboimpā, ante nāmā nānō pönēñō bai tæi gōnonte mænongacäimpā. Abadäo iñōmō, Botō māniī iñōmō owocæboimpā, ante nē wædongä inte wede pönēninqe piyæñē cædinque æmontaicōnenque owote inguipoga quëwengacäimpā.

¹¹Mönō imonte pönēninqe nē ædæmō aacä inongä inte Wængongui iñōmō tömengä nānō āninō bai cōwē cæcæcäimpā, ante nē wede pönēñā iñōmō Tada wodi ingadäimpā. Mänōmai beyæ tömēñā owæntadä iñōnante Wængongui pönō cæcä æninqe tömēñā picængadedä inōñā inte tæi piñæninqe yædēmadä bate wēñængä mangadäimpā. ¹²Abadäo wodi wede pönēninqe tæi piñænte tapæicä ate wēñængä ēñagacäimpā. Īninqe adocanque picængadecä inte nē wænte bai inongä inte wede pönengä beyænque möñō tömengä nānō pæimō yebæninqe nēmōncoo öönædē owocoo nanguī pōni i bai möñō iñōmō adobai nanguī pōni imompā. Ēmōnaicoo gāwapæ yæwedeca öñoncoo nanguī pōni i bai möñō tömengä pæimō imō adobai nanguī pōni iñōmonte möñō, Mānimpomō imompā, ante ædō cæte anguiī.

¹³Mānīnāni tōmānāni wede pōnente quēwēnōnāni inte wāngadānimpa. Wāngonguī nānō, Pōnō cācāboimpa, angaincoo ayā ānāmaī īnāni inte tōmēnāni gobā ongoncoo gomō ate baī, Cōwē āncāmōnimpa, ante wede pōnente piyānē cāte quēwēngadānimpa. Wadāni nēmā wabāca quēwente baī quēwēnīnque tōmēnāni, Wīi mōnitō ōmā īfōnte mōnitō wamōni inte quēwēmōnīpa, ante inguipoga owogadānimpa. ¹⁴Mānōmaīnō ante nē ānāni īfōmō, Tōmēmōni ōmā nē diquī diquī mēmōni imōnīpa, ante quēwēnānīpa. ¹⁵Dodāni īfōmō do nāni ēmō cāte pongāimā ante pōnente wādāni inte baī tōmēnāni do adodō gocādōnānimpa. ¹⁶Wāētē adodō mānīōmā nāni quēwēngāimā wīi goinēnīnque tōmēnāni, Mōnō ōnādē godōmenque wāēmōmā pōnī gote quēwēngāimā, ante goinente wāgadānimpa. Īnīnque wadāni Wāngonguī ingante, Bitō nē wāēmōmā goinente wādāni tōmēnāni Wāngonguīmi īmīpa cābīi, ante ānāni incā tōmēngā wāētē, Īnāmpa nē wādōnāni tōmēnāni quēwēngūīfōmō nāni wādō ante botō do eyepā mānongaboimpa, ānīnque guīfēnāmaī inte nanguī tocampa.

Abadāo tōnō Itāca

¹⁷Wāngonguī, Abadāo ābānō botō īmote ēñente cāquingāā, ante acāte ante angā ēñēnīnque Abadāo wodi nē wede pōnēnōngā inte tōmēngā wēngā Itāca ingante, Wāngonguī quī, ante godongacāimpa. Edā Abadāo ingante doyedē apānedīnque Wāngonguī, Bitō pāināni nanguī īnāni inte īimā āncādānimpa, ante do angā ēñēngacāimpa. Incāte Wāngonguī mānōmaīnō angā ante nē ēñēnīngā incā tōmēngā wēngā adocanque pōnī īnōngā inte Abadāo, Wāngonguī quingā ingampa, ante godoncā cāgacāimpa. ¹⁸Adocā tōmēngā wēngā ingantedō ante Wāngonguī doyedē Abadāo ingante apānedīnque, Bitō wēngā Itāca

pāinānīque īnānītedō ante botō, Abadāo pāināni īnānīpa, angacāimpa. ¹⁹Incāte Itāca wodi adocanque pōnī īnōngante Abadāo wodi, Botō wēngā do wēngā incāte Wāngonguī, Nāni ōmāēmō, angā īnīnque do nāni ōmāēmōmaingampa, ante wede pōnēnīnque godoncā cāgacāimpa. Wāngonguī guīquēnē, Ee ae, ante wāē angā beyānque tōmēngā wēngā ingante wānōnāmaī ingacāimpa. Īnīnque Itāca wodi do wāēnīngā inte baī nāni ōmāēmōte baī ayā quēwēngacāimpa.

Itāca, Acobo, Ootee

²⁰Itāca wodi adobaī, Wāngonguī ābānō cāquingāā, ante wede nānō pōnēnō beyānque ēñēnīngā inte edā picāngadecā badīnque Acobo wodi tōnō Etawoo wodi īnate apānedīnque, Wāngonguī mīnatō īmīnate īimāi pōnō wāā cācācāimpa, ante wāā apānegacāimpa.

²¹Acobo wodi īfōmō, Wāngonguī ābānō cāquingāā, ante wede nānō pōnēnō beyānque do ēñēnīngā inte wāncā cāte ōñōnīnque tōmēngā nānōmoda Ootee wodi wēna īnate, Mīnatō īmīnate Wāngonguī pōnō wāā cācācāimpa, ante wāā apānegacāimpa. Ayā ongontoca da cāte ongote ādā wāēnīnque, Wāngonguī bitō wāēmō pōnī īnōmi inte cāquīmīdō anguēnē, ante watapā apānegacāimpa.

²²Ootee wodi guīquēnē, Wantā īfō wāncāboimpa, ānīnque, Mōnō idāgocabo mōnō pāināni incā Equitobā wantāpiyā quēwēnāni ate Wāngonguī ānte māocā wadā gocādānimpa, ante tōmēngā nānō wede pōnēnō beyānque ēñēnīnque īimāi angacāimpa. Godīnque botō bayetoca ingāi ee ānte nāēante godīnque da wēncāmīnīmpa, angacāimpa.

Mōitee wodi

²³Mōitee wodi māmpoda guīquēnē wēñāngā ēñacā ate, Wīi ōnonganque ingampa. Wāēmō wēñāngā awādō, ante adīnque īimāi cāgadāimpa.

Māniñedē Equitobæ awënë odeye iñomō, Onguiñangä ēñacä adinque do wænongæimpa, angä incæte tömēna guiñēnāmaï inte tömēna wede nāna pönēnō beyænque wēñangä Möitee ingante apäicä mengäa go adocanque māmonque wē wodonte mangadaimpa.

²⁴Möitee wodi guiquēñē picangä bayongante wadāni, Awënë Padaönō wengä wæä Möitee badä ingampa, ante Möitee ingante waa ayönāni tömengä wæätē Wængongui ingante nē wede pönēnongä inte edæ Baa angacäimpa. ²⁵Wæätē edæ, Botō caate wæquinque botō Wængongui quināni tönō godongämä cæcæboimpa, ante cædinque Möitee wodi, Equitoidi nāni wīwa cæte töinō adinque botō wantæ iñō incæ wīi toñente awædō, ante wido cægacäimpa. ²⁶Wængongui iincayä ate eyepä pōñi pönongä æncæboimpa, ante wede pönēninque tömengä mäninō ante mīmōno gomō ate bai pönengacäimpa. Ayä Equitobæ quēwēnāni waëmoncoo pōñi nāni māincoo ante adinque, Önoncooque ëwenguincooque i awædō, ante Möitee edæ Baa angacäimpa. Wæätē edæ piinte badete todāni wæcä incæte tömengä, Codito beyænque impa, ante pönēninque godömenque waa pōñi togacäimpa.

²⁷Tömengä iñomō, Awënë odeye Padaönō ængui badinque piingä wæcæ wæ, ante guiñente wædāmaï inte wæätē wede pönēninque Equitobæ ëmō cæte gogacäimpa. Ayä Wængongui nē Quēwengä mönō awinca adāmaï inongä ingante Möitee wodi iñomō nē awinca gomō acä bai ëmongä inte wæntæye badāmaï inte godömenque cægacäimpa. ²⁸Ayä, Bamoncadē ēñadāni inānite nē ëwēnongä incæ godō wænoncæcäimpa, ante Wængongui angä ëñēninque Möitee wodi wæätē, Nē ëwēnongä nānō wodo pænta goqui ingäimpa, ante wede pönēninque cægacäimpa. Tömengä wadāni idægoidi tönō Patowa æämä mönō cämä bai mä cængacäimpa. Ayä, Nē ëwēnongä incæ mönō idægocabo bamoncadē ēñadāni inānite

wænönāmaï incæcäimpa, ante wææ cæcæte ante cædinque Möitee nē wede pönēnongä inte wadāni tönō godongämä odemompaa wepæ öni paagacäimpa.

²⁹Idægoidi guiquēñē wede pönēninque gäwapä Opatawämä nāni ämä goyä go næ gongämä ate tæcæguedēmä pōñi tao gogadānimpa. Equitoidi guiquēñē, Taadō bapa, mönō taocæimpa, ante cæyönānite æpæmpo becadote wængadānimpa.

Adacaba wodi

³⁰Idægoidi nāni wede pönēnō beyænque Eedicoo nāni quēwēñomō yabæque nāni wææ cægainca incæ nāwä cabænte wængatimpa. Edæ idægoidi önompo æmæmpoque go mēönaa mänimpoönæ iñonte yabæque godongämä cægonte godāni ate cabænte wængatimpa. ³¹Onquiængä Adacaba iñomō māincoo beyä ante nē towente nē quēwengä inongä incæte tömengä wede nānō pönēnō beyænque iïmaï cæte miingä quēwengacäimpa. Idægoda mēnaa, Eedicoo iñomō æbānō quēwēnāni, ante acæte ante awēmō pō guida adinque Adacaba wodi, Ee pöeda, angä beyænque idægoidi wæätē ëñēnāmaï ināni inānite wænöninque tömengä ingante ata cæpodāni quēwengacäimpa.

Wadāni nāni wede pönengäinō

³²Quinante godömenque ante apænequimoo. Iñāni nē wede pönēnāni nāni cægainō ante botō æiquedō apænequimoo. Guedeönō wodi tönō Badaco wodi ingadaimpa. Ayä wæä Tantöo wodi tönō Yepetee wodi ingadaimpa. Ayä wæä Awënë Dabii wodi tönō Tämoedo wodi ingadaimpa. Mänināni tönō Wængongui beyä nē apænegañāni wodi tömānāni wede nāni pönēnō beyænque iïmaï cædinque nanguï cægadānimpa.

³³Nē wede pönēnāni iñomō täï ëmonte badinque wabæca awënë odeyeidi nempo quēwēnāni inānite bæ tadinque wido cægadānimpa.

Pancadäniya wede pönëninque wadäni beyä wææ äninque nö cægadänimpa. Wacä, Cæcæboimpa, äninque do cæquëngä incæ wii cæcä ininque në pönënanä pancadäniya, Bitö äno cæcæbiimpa, änanä ëñëninque do cægacäimpa. Pancadäniya näni wede pönëno beyænque mëñeidi incæ ecadämaï inäni bagadänimpa. ³⁴Gonga nanguï wo bæco adinque pancadäniya wede näni pönëno beyænque mönä ëmongatimpa. Wadäni yaëmenca tamengacæ cædäni wædinque në pönënanä pancadäniya aamö cædinque miïnäni quëwengadänimpa. Aquii pöni ininäni inte në wede pönënanä pancadäniya täi piñænte bagadänimpa. Wabæca tontadoidi wænoncæ pönäni adinque në pönënanä pancadäniya wæætë täi piñæninque wido cædäni gogadänimpa. ³⁵Tömënanä guidënëni näñe wænäni ate onquiyænäni wede näni pönëno beyænque do wænininäni quëwënanä ate ængadänimpa.

Näni caate wægäinö

Ayæ adobaï në pönënanä inänite wiwa cædäni caate wæyönänite wacä, Ata cæpobo goquimi, angä incæte në caate wædönäni pancadäniya wæætë, Ee abi caate wæwëmoe, änanitapa. Tömënanä, Botö iincayæ ate ñäni ömæmöninque caate botö wædo beyænque godömenque waa quëwencæboimpa, ante wææ äninque Ao änämaï ingadänimpa. ³⁶Tömënanä näni wede pönëno beyæ pancadäniya inänite wadäni badete togadänimpa. Wadäni inänite wæætë täi täi pangadänimpa. Wadäni inänite wæætë yaëmengö ñä cæyæninque tee mönedäni wægadänimpa. ³⁷Pancadäniya inänite dicaca tacadäni wængadänimpa. Pancadäniya inänite ta wiyænäni wængadänimpa. Pancadäniya inänite yaëmenca yedäni wængadänimpa. Pancadäniya obega æmontai tönö caboda æmontai badöninque mäninque wëñate mongæninque ömæpodäni inte wæyönänite wadäni togænte päninque wiwa cægadänimpa. ³⁸Tömënanä në

wede pönënanä inte waa pöni inäni iñönänite inguipogaque quëwënanä wæætë wii tömënanä bai inäni inte wënæ wënæ cægadänimpa. Në pönënanä iñömö pancadäniya, Æyömömë gote quëwenguimoo, ante pönente wædinque wodii winonte önömæca wayömö godinque änanquidi wayömö godinque oncontatodë guidinque pancadäniya wë womöñönäni pancadäniya onguipodë ææ wote wë womongadänimpa.

³⁹Ininque Wængonguï tömënanä inänite, Wede mini pönëno adinque botö waa tobopa, ante apænegacäimpa. Incæte tömengä nänö, Pönö waa cæcæboimpa, angäinö ante tömënanä mäniñedë ayæ ænämaï ingadänimpa. ⁴⁰Edæ tömënanä adodäninque wii æncædänimpa, angacäimpa. Wæætë Codito godömenque pönongä æninque mönö watapæ quëwëñömonte tömënanä mönö tönö godongämæ æninque ædæmö picænäni bai bacædänimpa, ante Wængonguï mönö imonte waa cædinque tömënanä beyæ adobaï waa cægacäimpa.

Itota ingante mönö cöwë adinque quëwengäimpa, ante

12 ¹Ininque boguimä bacoo owo bai mäninäni iñömö, Wængonguï cöwë pönö cæcæcäimpa, ante në wede pönëngänäni iñömö adobaï bacoo ongönänipa. Edæ, Mönitö wede pönente möni cægäi bai minitö adobaï wede pönëninque iïmaï cæedäni, ante a ongonte bai apænedänipa cæmöö. Tömënanä quingæ pogodo gocæte ante cædäni teëmencoo gä äadäni bai cædinque mönö adobaï oda caate mönö wædoncoo ante ñimpo cæcæäimpa. Wënæ wënæ mönö cægaincoo ante, Ancaa cæte awædo, äninque mönö wido cæcæäimpa. Ayæ taadö ante Itota nänö odömongäinonque ante mönö edæ wæntædämaï inte täi piñæninque pogodo gocäimpa. ²Mönö wede pönente æite godö taadö ante tömengä iñömö në täno beyænte gogaingä ingampa. Tömengä adocä incæ mönö wede pönëno ante, Cöwë mänömaï bacæäimpa, ante

ædæmō badongaingā ingampa. Tōmengā iñōmō wadāni tōmengā ingante awæ timpodāni wæyongante badete todāni adinque tōmengā, Mānōmaī cædāni botō caate wædō beyænque botō iincayæ ate watapæ tocæboimpa, ante nē ēñēningā inte piyænē cædinque caate wædinque wængacäimpa. Tōmengā ñowo iñōmō ñāni òmæmonte æite godinque Awēnē Wængonguī nānō containpaa tōmēmængā inō tæ contate Awēnē bate ongōñongā mōnō adocā Itota ingante æmō ate bai pōnēninque edæ tōmengā miñæ tee empote pogodo gocæimpa.

³Tōmengā iñōmō nē wīwa cædāni nanguī piinte cædāni wæcā incæte piyænē cægacäimpa. Īninqe mīnitō iñōmō, Wæntædāmaī inte mīmō nangæ batawēnāmaī ingæimpa, ante cædinque, Tōmengā æbānō cægacāi, ante pōnēedāni. ⁴Ñowo ganca mīnitō wēnæ wēnæ mīni cæinente wædō ante wido cæcæte ante mīnitō wænguī beyæ wepæ dicæ gowete cæmīniyaa. ⁵Ayæ Wængonguī mōnō wampo pōnencæmōimpa, ante mōnō imonte, Botō wēmīni godōmenque cæcæmīnimpā, ante æbānō pōnō angacāi, ante mīnitō dicæ pōnēmīniyaa. Īmaī angacäimpa, ante yewæmongatimpā.

“Botō wēmi ēñēmi. Mōnō Awēnē bitō imite, Ēñente cæcæbiimpā, ante pangā wædinque, bitō wæætē badete todāmaī incæbiimpā.

Bitō imite, Ēñenguēnē quēwēe, angā ēñente wædinque wæwēnāmaī incæbiimpā.

⁶Īñæmpā tōmengā nānō nē waadete pōnēnānique inānite pāninque mōnō Awēnē iñōmō,
Ēñencæmīnimpā, ante cæcampa.

Botō wēmīni, ante nānō nē ængainānique inānite tōmengā pangampā.”

⁷Ante yewæmongatimpā cæmīni.

Mīnitō caate wæmīni imīnitawo.

Īñæmpā wēñænāni inānite wæmpoidi

dicæ pānāmaī inguināniyaa. Mæmpo Wængonguī iñōmō adobai, Botō wēmīni imīnīpā, ante edonque acæimpa, ante nanguī āninque pangā caate wæmīnīpā. Īninqe tōmengā pangā wædinque mīnitō wæætē, Mōnō ēñente quēwenguinque ante Mæmpo Wængonguī pangampā, ante piyænē cæte ee amīni pancæcäimpa. ⁸Tōmengā wēñæmō iñōmonte tōmengā tōmāmō imonte edæ nanguī pante angampā. Incæte mīnitō pancamīniyā imīnite tōmengā pante ānāmaī ingantawo. Īninqe mīnitō, Wīi Wængonguī wēmōni imōnīpā. Wacā wēmōni imōnīpā, ante wæquēnēmīni imīnīpā.

⁹Mōnō mæmpoidi waodānique inōnāni inte nanguī āninque pānāni adinque mōnō, Mæmpocā inongā inte tōmengā nānō cæquēnēnonque cædinque mōnō imonte waa cæte pangantapā, ante tōmēnāni inānite waa atampā. Mōnō Mæmpo Wængonguī adobai mōnō imonte nanguī āninque pangā adinque mōnō quēwenguinque mōnō tōmengā ingante godōmenque Ao ante ēñente cæcæimpa. ¹⁰Mōnō mæmpoidi guiquēnē, Æbānō pōnō waa cæquīmoo, ante pōnente ate mōnō imonte edæ, Ēñencæmīnimpā, ante wantæ iñō nanguī ānāni ēñente cætamampā. Wængonguī iñōmō edæ, Tæiyæ waēmō botō ēwocabo bai mīnitō adobai tæiyæ waēmō ēwocadinque watapæ quēwencæmīnīpā, ante cædinque mōnō waa quēwenguinque ante pōnō pangampā. ¹¹Æcāmenque mōnō imonte nanguī āninque pāna inçæ tōmengā pangā ate mōnō caate wædinque dicæ quingæ watapæ tomongaa. Īñæmpā, Caate awædō, ante cōwē āmompā. Wæætē iincayæ ate edæ doyedē nāni pānō beyænque mōnō nē ēñente badōmo ate mōnō nō cæmō badinque gānē pōnente entawēmompā.

**Mōnō wæquinque Wængonguī
apænecā ēñēnāmaī imompā**

¹²Īninqe mīnitō guēpante wædīmīni inte edæ tæi pīñænīnque wæntædāmaī

inte nanguĩ cædæni. Ōnoncapo nanguĩ guecapote wædĩmini inte edæ guecapodæmai inte ængæ gantite pogodo gote bai nanguĩ cædæni.

¹³Mönö cægonguinö, ante minitö taadö ante enga womini mæmö ba ate nê podä cædinæni incæ podä cædæmai inte tömænani nani waa baquinque mäninönö töinö gote waa cægoncædänimpa, ante godö waadete cædæni.

¹⁴Mönö godongämæ piyænê cæte quëwengæimpa, ante minitö nanguĩ tæi piñæninqe waodani tömänani inänite gänê pönente cædæni. Ayæ, Æcänö tæiyæ waëmö ewocadæmai ingää tömengä iñömö mönö Awënë ingante cöwê adæmai incæcäimpa, ante pönente wædinque minitö, Mönö tömämö Wængonguĩ ayongä tæiyæ waëmö ewocate quëwengæimpa, ante nanguĩ cædæni. ¹⁵Wængonguĩ pönö waadete nänö cædö ante mönö tömämö ænte entawengæimpa, ante cædinque minitö cöwä adinqe, Adocanque incæ ömætawengä inæmai incæcäimpa, ante wææ cædæni. Adocanque wæwente nänö quëwënö beyæ piinte bate tedecä ëñëninque minitö, Wadani nani wentamö mongænguinque adobai piinte badæmai incædänimpa, ante wææ cædinque nê piingä ingante godö wææ ædæni. ¹⁶Ayæ mini cabo incæ, Nänöogængä inæmai iñongante adocanque incæ godö mönæmai incæcäimpa, ante cöwä adinqe wææ cædæni.

Etawoo wodi iñömö tömengä bamoncadengä inongä inte nänö nanguĩ ænguënencoo ante piinte bai cædinque cænguinque æncæte ante tömancoo godonte beyæ adopoque ænte cængacäimpa. Minitö guiquënë, Inguipogaque ante ænte to wædö, ante Etawoo wodi nänö pönëwente cægainö bai adocanque incæ cædæmai incæcäimpa, ante edæ wææ cædæni. ¹⁷Bamoncadengä inte nänö ænguënencoo ante do piinte bai godöningä inte Etawoo wodi

iñcayæ ate, Pönömi æmoe, añongante mæmpocä wæætê Baa angacäimpa, ante do ëñëminipa. Edæ Ca ca wædinque tömengä, Æbänö cæte ænguimoo, ante ancaa angä incæte mæmpocä do Baa äningä inte nöwo wæætê wadö ante ædö cæte anguingää.

¹⁸Onquiyabo Wængonguĩ nänö gonga tänongä bæcobo ñænoque dodani ponte godongämæ ongonte cægönani bai minitö wiĩ onquiyabo ñænoque pöminipa. Tömænani wëmö mæ mæmonte bai iñömö wini cai pæmæmæmo iñömö nani ponte wægaiñömö bai minitö wiĩ pöminipa.

¹⁹Todompeta nani ancadeca nanguĩ we öömæmo dodani nani ëñente wægaimæmo bai minitö wiĩ adopæmo ëñëminipa. Wængonguĩ wææ ante nänö tedepæmo tömænani nani ëñente wægaimæmo bai minitö wiĩ adopæmo ëñëminipa. Mänimæmo ëñente guñente wædinque tömænani, Idæwaa ämipa. Ædö cæte godömenque ëñenguimönii, ante wægadänimpa. ²⁰Edæ “Cæningä incæ onquiyaboga ponte cægongä adinqe minitö tæi tacamini wæncæcäimpa,” ante wææ añongante tömænani ancai guñente wædinque, Wængonguĩ nänö wææ angainö ante mönitö ædö cæte ædæmö ëñente cæquimönii, ante wægadänimpa. ²¹Onquiyaboga nani ate guñëmæmo adinqe Möitæe wodi incæ, “Ancai guñente botö do do wæate bai wæbopa,” angacäimpa.

²²Minitö guiquënë Tiñoquidi nani änonquidi do ponte bai ewocaminipa. Edæ Wængonguĩ nê Quëwengä öönædê Eedotadëe bai nänö waëmö pönii owoyömö minitö mänñömö do ponte bai ewocaminipa. Wængonguĩ anquedoidi æpodö müido ganca inönani inte nanguĩ pönii inani godongämæ pö bee tente tömænani nani watapæ ongöñömö minitö mänñömö do ponte bai ewocaminipa. ²³Mönö Codito ingante godongämæ mönö pönencabo iñömö bamoncadænani nê ænguimö bayömonte mönö ëmöwo ante öönædê

yewæmointa do yewæmonte ongompa. Ìninqe mìnìtò adocabomìni badinque Wængonguì weca mònò waocabo tòmämö ìmonte nè apænte anguingä weca do pòmìni ìmìnipa. Nè nõ cæte quëwengainäni wænte goyönänite Wængonguì ìinque badongä ate do ædæmö picænäni bai badänipa. Tömënanì önöwoca weca mìnìtò do ponte bai ëwocaminipa. ²⁴Wængonguì, Botö pönö cæbo ate mìnìtò Ao ämìni ìninqe mònö godongämæ waa cæte quëwengæìmpa, ante nänö angainö ante Itota, Ìninqe bacæìmpa, ante ædæmö badongacäìmpa. Mìnìtò ìñömö nè badongaingä weca do pòmìni ìmìnipa. Abedo wodi wepæ onguipoiya gowecä adinque Wængonguì wæætë nè wænöningä ingante, Botö weca ongönämaì gobäwe, angacäìmpa. Itota wepæ wii Abedo wodi wepæ bai ìmæ adinque Wængonguì wæætë, Itota wepæ petä petä gowedimæ beyænque botö weca pöedäni, ante cægacäìmpa. Mänimæ Itota wepæ nänö petä petä gowegaiñömö mìnìtò do ponte bai ëwocaminipa.

²⁵Mänömaì waëmö pönì ìñömö do pòmìni inte mìnìtò nè apæneçä ingante Baa änämaì ìedäni. Onquiyabo godongämæ ongönäni guiquënë inguipoga wææ angaingä ingante Baa äninäni ìñönänite tömengä ata cæpodämaì inte pangacäìmpa cæminii. Öönædë ongonte nè wææ angaingä ingante ëñënamäi inte dadì ëmænte wadæ gomö bai mònö godömenque pante wæquënemö ìñömönte tömengä cöwë ata cæpodämaì incæcäìmpa.

²⁶Mäniñedë tömengä nänö tedepämo beyænque inguipo wancæ wancæ cægatimpa. Nöwo ìñömö tömengä, “Botö iincayæ ate inguipo adopoque pönì wancæ wancæ cædinque öönædë adobaì wancæ wancæ edæ cæcæboimpa,” angacäìmpa. ²⁷Tömengä, “Ìincayæ ate adopoque pönì cæcæboimpa,” angacäìmpa, ante pönëninque mònö ìimaì ante ëñengæìmpa. Tömengä adopoque wancæ wancæ cæcä ate

tömengä nänö badongaincoo oo pönì ongoncoo ìñömö tömancoo adoyedë ëwente bacæìmpa. Quincodö oo ongönämaì tæi ongoncoo ì mänincooque ayæ a ongongæìmpa, ²⁸Ìninqe mònö Awënë Odeye nempo quëwëmö ìñömö wancæ wancæ cædämaì inte tæi ongonguimö ìmompä, ante pönëninque mònö Wængonguì ingante waa ate pönente apæneçäìmpa. Mänömaì cædinque Wængonguì nãö bai nänö tæi ëmömämo ate guiñente wædinque tömengä beyæ cæcæìmpa. ²⁹Edæ mònö Wængonguì ìñömö edæ gonga wo bæcoqui bai ingänö anguënë, ante ämo ëñëmaimìnipa.

**Ìimaì cæmö adinque Wængonguì
waa tocæcäìmpa, ante**

13 ¹Mìnìtò ìñömö, Mönö caipæ ìmompä, ante mìnì waadete pönëno bai cædinque cöwë godongämæ waadete pönente cædäni. ²Tömänäni ìnänite edæ, Pöedäni, ante waadete cædäni. Mänömaì cædinque pancadäniya, Botö weca ædänidö ëñacæ pönänii, ante ëñënamäi ìnänì incæte do waa cædäni ate edæ, Æ, Wængonguì nänö da pönönäni anquedoidi incæ botö weca pönänitapa, ante tæcæ abopa, ante todänipa.

³Tee mönete ongönäni tönö botö godongämæ tee mönete wæcömo bai ìmopa, ante pönëninque mìnìtò tömënanì ìnänite ante cöwë pönëedäni. Pancadäniya ìnänite wadäni wìwa godö cædäni ate caate wæwëñönäni mìnìtò adobaì pönëninque, Mönö baö adobaì ëñamö inte tömënanì tönö godongämæ caate wæmö bai ìmompä, ante tömënanì ìnänite cöwë pönëedäni.

⁴Nänöogængä ìnämaì ìñongante waocä nè godö guëa mongä tönö nè godö wìwa towënäni ìñönänite Wængonguì mäninäni tömänäni ìnänite do apænte ante pancæcäìmpa cæminii. Mìna gæncaya adominaque guëa moncæmìnaimpa. Ayæ nänönäni möninqe nana gæncaya quëwëna ate, Waa ìmpa, ante mònö waa acæìmpa.

⁵Wængongui incæ, “Minitō iminite cōwē ěmō cæte godāmaī inte botō cōwē aacæboimpa,” angacæimpa. Mānōmaī beyæ minitō godonte æinta ante æinente wædāmaī inte mīni ěadincooque ěadinque piyænē cæte quēwēedāni.

⁶Īninqe Wængongui beyæ ĩmaī ante nāni yewæmongainō bai ante mōnō wede pōnente apænemompa.

“Mōnō Awēnē botō tōnō godongāmæ cæcā adinqe botō,

Wacā ædō cæte botō imote wēnæ wēnæ cæquingāā, ante ěnēmo inte guiñēnāmaī incæboimpa.”

⁷Nē aadāni ĩñōmō minitō iminite Wængongui nānō ānō ante nē apænēdāni inānite ante pōnēninqe minitō, Tōmēnāni ĩñōmō waa cædinque edæ watapæ quēwēnānīpa, ante pōnēedāni. Ayæ tōmēnāni nāni wede pōnēnō bai adobaī wede pōnēedāni.

⁸Itota Codito ĩñōmō wēēnēñedē nānō ingāī bai ingā nōwoonæ adobaī ingā inte tōmengā adocā ĩncayæ ate cōwē adobaī incæcæimpa.

⁹Wadāni, Wacā taadō odōmonte apænebo ěñēe, āñōnānite tōmēnāni mīñæ godāmaī ĩedāni. ĩñæmpa tōmēnāni cænguinque ante, Æbānō waa pōnī cō cæquiī, ante wææ ānāni incæte māniī cænguincoo beyæ tōmēnāni wīī godōmenque watapæ quēwēnānīpa. ĩninqe mānincoo cænte beyæ mōnō mimō ædō cæte tæī piñænte entawenguiī. Wæætē edæ Wængongui nānō waadete pōnō cædō beyænque mōnō tæī piñænte entawengæimpa.

¹⁰Æmontaicōnē cædinque, Wængongui qui, ante nē godōnāni ĩñōmō tōmēnāni nāni iya tāimpaa godōninqe pancaa cængui ænte nē cænguēnēnāni ĩnōnāni incæte tōmēnāni mōnō Codito mōnō beyæ nāmā nānō wepæ godongainō guiquēnē ædō cæte ænguīnāni.

¹¹Cænīnāni inānite wænōnāni ate nē godongā ñænængā pōnī ĩnongā ĩñōmō wepænque æninqe, Wēnæ wēnæ mōni cædinō ante Wængongui pōnō ñā mēnongacæcæimpa, ante cædinque Tæiyæ Waēmō Pōnī Oncōnē wāānē guidinque

godongampa. Godongā ate baonque, Wentamō mongænte awædō, ante æninqe tōmēnāni nāni quēwēñōmō yabæque māo iya tangadānīmpa. ¹²Itota adobaī, Botō wepæ pōnō mēnongabo ate botō quiīmīni ĩñōmō tæiyæ waēmō ěwocate quēwencæminīmpa, ante cædinque wentamō mōnō entawēnō ænte teēmē mongænte godinque tōmēnāni quēwēñōmō wææ cædinemō tao godinque yabæque pōnī guiñēñate wædinque caate wængacæimpa cæmōō. ¹³Tōmengā yabæque pōnī guiñēñate wædinque nānō tao gogaī bai mōnō adoyōmō tōmengā weca tao gote ado guiñēñate wæcæīmpa. ¹⁴Īñæmpa inguiipoga mōnō quēwēñōmō tæī ongompa diyæ wantæpiyæ quēwenguiī. Wæætē oōnædē ĩncayæ ate edæ mōnō cōwē quēwenguiñōmō ante æinente wædinque wānō cōmompā.

¹⁵Īninqe, Wængongui qui, ante cængui godōnāni bai cædinque mōnō ĩñōmō edæ, Itota ěmōwo beyænque quēwēmōnīpa, ante nē apænemō inte tōmengā ěmōwo ante Wængongui ingante apænēdinque, Bitō tæī ěmōmi inte waa pōnī cæbīpa, ante watapæ apænecæīmpa. ¹⁶Ayæ ñimpo cædāmaī inte minitō wadāni inānite cōwē waa cæedāni. Ayæ wadāni inānite mīni mānincoo godō nēnempomīni æncædānīmpa. Minitō mānōmaī, Wængongui qui, ante godonte bai cædinque nēnempomīni adinqe Wængongui mīni godōnō ante waa acampa. ¹⁷Minitō, Mōnō imonte nē ānāni inānite mōnō Ao ante ěñengæīmpa, ante pōnēninqe nē aadāni inānite cōwē ěñente cæedāni. Tōmēnāni, Æbānō cæboo, ante adinqe Wængongui apænte ancæcæīmpa, ante ěñēninqe guiñente wædāni inte nō cædinque aadānīpa cæminī. Tōmēnāni mānōmaī aadinque watapæ tote quēwencædānīmpa, ante minitō wæætē tōmēnāni nāni ānōnō ante ěñente cæedāni. Minitō wæætē ěñēnāmaī ĩmīni adinqe tōmēnāni wæætē edæ, Ædō cæte aaquīmōnīi, ante wæwente

badāni īninque mīnitō adobaī todāmaī īmaīmīnīpa.

¹⁸Mōnitō beyæ ante Wængonguī ingante apæneedāni. Mōnitō mīmō entawēmōni inte wentamō entawēnāmaī īmōnīpa, ante nāmā apænte pōnēmōnīpa. Edæ, Quiēmē cæmō incæ mōnō cōwē nō cæte quēwengæīmpa, ante cæmōnīpa.

¹⁹Botō mīnitō weca ocæ emænte pōinēmopa. Īninque mīnitō Wængonguī ingante apænedīnque, Wængonguī, bitō pōnō cæbi ate Pabodo mōnitō weca poncæcāīmpa, ante apæneedāni, ante nanguī āmopa.

**Mīnitō īmīnite Wængonguī
waa cæcæcāīmpa, ante**

²⁰Wængonguī inguipoga nānō badōnāmaī īnedē wēenēnedē pōnī ānīnque edæ, Mōnō godongāmæ waa cæte quēwengæīmpa, ante tōmengā nānō angainō baī cōwē nē badongāingā inte īīmaī pōnō cægacāīmpa. Edæ mōnō obegaidi baī īñōmonte Awēnē Itota īñōmō mōnō imonte nē Aacā ñænængā īnongā inte tōmengā wepæ gowegaimæ eyepæ pōnī godongā ate Wængonguī tōmengā ingante, Eyepæ ī, ānīnque, Ñāni ōmæmōe, angā ñāni ōmæmongacāīmpa. Mānōmaī gānē pōnente nē cægāingā inte Wængonguī īñōmō, ²¹waa pōnī pōnongā ante eyepæ entawēnīnque mīnitō īñōmō tōmengā

nānō ānō baī cæcæmīnīmpa. Tōmengā Itota Codito tōnō godongāmæ cædinque pōnō cæcā ænīnque mōnō tōmengā nānō waa adoncooque entawengæīmpa, āmopa. Itota Codito īñōmō ñōwopāmo incæ īncayæmāmo incæ cōwē nē tæī emōnongā inte ñāō emongā amōnīpa, ante mōnō tōmengā ingante cōwē watapæ apænecæīmpa. Mānōmaī ingæīmpa, ante botō, Amēē, āmopa.

²²Īñānāni ēñēedāni. Botō mānīnō tōmānō ante apænecæte ante wædænque pōnī yewæmōmopa. Īninque mānīnō botō ædæmō apænedīnō ante mīnitō piyænē cædinque ēñēedāni, āmopa.

²³Mōnō tōniñacā Tīmoteo tee mōnete wæyongante ñōwo ñīmpo cædāni gocantapa, ante apænebo ēñēedāni. Tōmengā botō weca quingæ pongā īninque botō tōmengā tōnō guēa mīnitō weca ēñacæ pōmaimōnāpa. ²⁴Mōnitō beyæ apænedīnque mīnitō īmīnite nē aadāni īnānite, Waa quēwencæmīnīmpa, ante apæneedāni. Ayæ adobaī Wængonguī quīnāni tōmānāni īnānite, Waa quēwencæmīnīmpa, ante mōnitō beyæ æedāni. Ayæ, Mīnitō imīnite ante apænedīnque Itadiabæ quēwēnāni adobaī, Mīnitō waa quēwencæmīnīmpa, ante apænedānīpa, ante āmo ēñēedāni. ²⁵Mīnitō tōmāmīni imīnite Wængonguī pōnō waadete cæcæcāīmpa. Mānīnque ante yewæmōmopa.